

OPUSCULUM VI.

DE PERFECTIONE VITAE

AD SORORES



PROLOGUS¹.

1. *Beatus homo, quem tu erudieris, Domine, et de lege tua docueris eum*². Neminem censi sapientem fateor, nisi eum solum, quem Spiritus sancti docuerit unctio. Ille enim, teste David propheta, solus vere beatus est, solus vere sapiens, cuius mentem Dominus erudierit, cuius animum de lege sua docuerit. *Lex enim Domini*³ sola est *immaculata*, sola irreprehensibilis, sola *convertens animas* ad salutem. Huius autem legis doctrina sive eruditio non tantum foris quaerenda est in littera, sed potius per devotae mentis affectum. Est autem desideranda in *spiritu et virtute*⁴, ut ille videlicet intus doceat, qui solus novit exteriorem legis asperitatem in interiore dulcedinem commutare. Docet autem lex Domini, quid *agendum*, quid *fugiendum*, quid *credendum*, quid *orandum*, quid *desiderandum*, quid *timendum*; docet esse immaculatum et irre-

prehensibilem; docet servare promissa, deflere commissam; docet mundana contemnere, carnalia respicere; docet denique totum cor, totam animam, totam mentem in solum convertere Iesum Christum⁵. Ad huius doctrinae comparisonem omnis mundana sapientia stulta est et fatua. Bernardus⁶: « Dicat quicumque vult, ego non dicam sapientem, dum non timebit neque diligit Deum ». Qui huius doctrinae auditor non obliviosus, sed factor fuerit studiosus, hic vere sapiens erit, hic vere beatus. *Beatus ergo homo est, quem tu erudieris, Domine, et de lege tua docueris eum*.

2. Tu itaque, Deo devota, dilecta mihi, reverenda mater⁷, rogasti me, ut de cordis mei penuria aliquid dictando scriberem, in quo tuum animum devotionis gratia valeas pro tempore erudire. Sed certe fateor, pro insufficientia mea huiusmodi eruditione

Occasio scribendi hoc opusculum.

¹ Codd. BC *Incipit prologus in tractatum Bonaventurae de profectu vitae religiosae*; E *Sequitur prologus in opusculum sancti Bonaventurae, Doctoris seraphici de profectu vitae ad sorores suas*.

² Psalm. 93, 42. — Subinde respicitur I. Ioan. 2, 20: Sed vos unctionem habetis a Sancto et nostis omnia; cfr. ibid. v. 27. — Inferius fide BCD supplevimus *cuius animum de lege sua docuerit*.

³ Ut dicitur Ps. 18, 8.

⁴ Respicitur I. Thess. 4, 5: Quia Evangelium nostrum non fuit ad vos in sermone tantum, sed et in virtute et in Spiritu sancto. — August., in I. Ioan. tr. 3. n. 13: Nolite putare, quemquam aliquid discere ab homine. Admonere possumus per strepitum vocis nostrae; si non sit *intus qui doceat*, inanis fit strepitus noster... Quantum ad me pertinet, omnibus locutus sum, sed quibus unctio illa intus non loquitur, quos Spiritus sanctus intus non docet, indocti redeunt. Magisteria forinsecus adiutoria quaedam sunt et admonitiones; cathedram in caelo habet qui corda docet etc. Cfr. tom. V. pag. 324, nota 2. — Codd. BC hanc propositionem cum praecedente coniungunt legentes *sed potius per devotae mentis affectum est desideranda etc.*

⁵ Matth. 22, 37: Diliges Dominum Deum tuum ex toto

corde tuo et in tota anima tua et in tota mente tua. — De mundana sapientia cfr. lac. 3, 13. seq. et supra pag. 46, nota 7.

⁶ Serm. 73. de Diversis (alias 36. ex Parvis): « Discat quantum vult, ego sapientem non dixerim, dum nec timebit nec diligit Deum ». Pro *Dicat* C cum textu originali *Discas*; B voci Bernardus praefigit *Quoniam dicit beatus*. — In seq. propositione respicitur lac. 1, 22. seqq.: Estote autem factores verbi et non auditores tantum... Qui autem perspexerit legem perfectam et permanserit in ea, non auditor obliviosus factus, sed factor operis, hic beatus in facto suo erit.

⁷ Du Cange: *Mater*, abbatissa, monasteriorum sanctimonialium praefecta, apud Hieron. in Epist. ad Sabinianum [ed. Maurin. Epist. 147. alias 48. n. 5.], Gregorium Registr. lib. 7. Ind. 2. Epist. 28. [ed. Maurin. Epist. lib. 9. Ind. 2. Epist. 29.] etc. Cfr. Adelger., Admonitio ad Nonsuindam reclusam (Migne, Patrol. Lat. tom. 134. col. 915 seqq.), ubi recurring *carissima mater* (in Prologo), *sanctissima mater* (c. 2. et c. 7. c. 11. etc.); Anselm., Epist. lib. III. epist. 125. — Codd. BC hic et per totum opusculum utuntur voce *mater*; saepe cum ipsis conveniunt FD, immo etiam ipsa Vat. c. 6. n. 11. idem habet, dum aliis in locis substituit *soror*. Praedictos codd. sequemur substituendo *mater* pro *soror*.

me potius indigere, praesertim cum apud me nec vita foris resplendeat, nec devotio intus ardeat, nec scientia suffragetur; tuae tamen devotionis provocatus desiderio, sic obediivi humiliter¹, sicut suppliciter postulasti. Rogo autem beatitudinem tuam, mater sanctissima, quatenus magis penses intentionis affectum quam operis effectum, magis dictorum veritatem quam sermonis venustatem; et ubi tuo minus satisfeci desiderio propter brevitatem et occupationem temporis, mihi benigne indulgeas et ignoscas.

Ut autem facilius possis invenire quod quaeris, ^{Capitala puseuli.} ideo singulorum capitulorum praemisi titulos.

Et primo agitur de vera sui ipsius cognitione.

Secundo, de vera humilitate.

Tertio, de perfecta paupertate.

Quarto, de silentio et taciturnitate.

Quinto, de studio orationis.

Sexto, de passionis Christi memoria.

Septimo, de perfecta Dei caritate.

Octavo, de finali perseverantia.

CAPITULUM I.

De vera sui ipsius cognitione.

1. Ad perfectionis² vitae fastigium sponsae Christi cupienti conscendere primum necesse est, ut a se ipsa incipiat, ita ut, omnium exteriorum oblita, ingrediatur in secretum conscientiae suae, ibique omnes defectus suos, omnes consuetudines, omnes affectiones, omnes operationes, omnia peccata tam praeterita quam praesentia diligenti consideratione discutiat, examinet et inspiciat; et si quid minus rectum³ apud se invenerit, statim defleat in amaritudine cordis sui. Et ut ad hanc cognitionem, dilecta mater, melius possis venire, scire debes, quod omnia peccata nostra et mala aut committimus per *negligentiam*, aut per *concupiscentiam*, aut per *nequitiam*⁴. Et circa ista tria debet omnium malorum tuorum versari recordatio; alioquin ad tui ipsius cognitionem perfectam nunquam poteris pervenire.

2. Si igitur te ipsam cupis cognoscere, cognoscendo mala commissa deplangere⁵; primo debes recogitare, si aliqua in te sit vel fuerit *negligentia*: debes, inquam, recogitare, quam negligenter *cor tuum custodis*, quam negligenter *tempus tuum expendis*, quam *malum finem* operi tuo *imponis*. Haec enim tria cum summa diligentia sunt observanda, ut scilicet cor bene custodiatur, tempus utiliter expendatur, et finis bonus et debitus in omni opere praefigatur. — Item debes recogitare, quam negligens fueris in *oratione*, quam negligens in *lectione* et quam negligens in *operis executione*. In his enim tribus debes diligentissime te ipsam exercere et excolere,

si vis fructum bonum facere et dare in tempore suo⁶, ita quod nequaquam unum sufficit sine alio istorum. — Item debes recogitare, quam negligens sis vel fueris *ad poenitendum*, quam negligens *ad resistendum* et quam negligens *ad proficiendum*. Debes enim cum summa diligentia *deflare* mala commissa, *repellere* diabolica tentamenta et *proficere* de una virtute in aliam⁷, ut possis pervenire ad terram promissam. Sic debet circa negligentiam tuam versari cognitio.

3. Si autem melius te ipsam cupis cognoscere, debes secundo recogitare, si in te vigeat vel viguerit *concupiscentia voluptatis*, *curiositatis* aut *vanitatis*⁸. — Certe tunc viget *concupiscentia voluptatis* in religioso homine, quando appetit *dulcia*, videlicet cibaria saporosa, quando appetit *molliam*, scilicet vestimenta deliciosa, quando appetit *caralia*, videlicet oblectamenta luxuriosa. — Certe tunc viget *concupiscentia curiositatis* in Dei famula, quando appetit *scire occulta*, quando appetit *videre pulchra*, quando appetit *habere rara*. — Certe tunc viget *concupiscentia vanitatis* in sponsa Christi, quando appetit hominum *favorem*, quando quaerit⁹ humanam *laudem*, quando desiderat humanum *honorem*. Ista omnia debet ancilla Christi tanquam venenum fugere, quia istae sunt radices omnis mali.

4. Item, si certam tui ipsius vis¹⁰ habere notitiam, debes tertio recogitare diligenter, si in te vigeat vel vigerit *nequitia iracundiae*, *nequitia*

¹ Fide B C supplevimus sic obediivi humiliter, contra quos Vat. prosequitur et sicut cum humilitate suppliciter etc. Inferius pro minus satisfeci (ita B C) Vat. non satisfeci, et occupationem, ipsum mihi pro occupationem temporis, mihi.

² Codd. D F perfectioris. Dein pro conscendere C ascendere.

³ Ita B C F, Vat. si quod minimum peccatum.

⁴ Vide supra Opusculum I. de Triplici Via, c. 4. n. 4-6, ubi iisdem fere verbis ea occurrunt, quae hic n. 2-4 exhibentur. — Subinde ex C D E F supplevimus malorum.

⁵ Ita B C D F, Vat. cupis cognoscere, considera mala com-

missa et ea deplange, quae etiam inferius pro quam negligenter cor (ita B C D F) substituit qualiter cor.

⁶ Respicitur Ps. 1, 3. supra pag. 4, nota 5. allegatus. — Superius pro exercere Vat. cum nonnullis codd. exercitare.

⁷ Vide supra pag. 4, nota 7. verba Ps. 83, 8. allata. — Inferius pro promissam (ita B C F) Vat. promissionis.

⁸ Codd. B C D F omittunt voluptatis, curiositatis aut vanitatis.

⁹ Codd. B C F appetit.

¹⁰ Ita D F, Vat. si certam et perfectam vis.

invidiae, nequitia *accidia*. — Audi quod dico sollicite. Certe tunc in religioso homine viget *iracundia*, quando vel animo, vel corde, vel affectu, vel signo, vel facie, vel verbo, vel clamore quantumcumque modicam indignationem ex corde, vel rancorem¹ proximo suo ostendit. — Tunc autem in homine regnat *invidia*, quando gaudet de proximi adversitate et tristatur de proximi prosperitate, quando laetatur de malis proximi et tabescit de bonis ipsius. — Tunc autem *accidia* viget in religioso, quando fuerit tepidus, somnolentus, otiosus, tardus, negligens, remissus, dissolutus, indevotus, tristis et taediosus². Haec omnia sponsa Christi debet detestari et fugere tanquam venenum mortiferum, quia in his consistit perditio corporis et animae.

5. Si igitur, Deo amabilis famula, ad tui ipsius perfectam vis venire cognitionem, « redeas ad temetipsam, intres in cor tuum, discas aestimare spiritum tuum. Discute, quid sis, quid fueris, quid esse debueris, quid esse poteris: quid fueris per naturam, quid modo sis per culpam, quid esse debueris per industriam, quid adhuc esse poteris per gratiam³ ». « Audi adhuc, mater, audi prophetam David, quomodo se tibi in exemplum proponat⁴: *Meditatus sum*, inquit, *nocte cum corde meo, exercitabar et scopebam spiritum meum. Meditabatur ille cum corde suo; meditare et tu cum corde tuo. Scopebat ille spiritum suum; scope et tu spiritum tuum; exerce agrum istum, attende ad temetipsam. Absque dubio, insists huic exercitio, invenies thesaurum pretiosum absconditum⁵. Ex hoc enim exercitio crescit anni copia, multiplicatur scientia, augmentatur sapientia; ex hoc exercitio cordis oculus mundatur, ingenium acuitur, intelligentia dilatatur. Nihil recte aestimat qui se ipsum ignorat, qui conditionem suae dignitatis non*

pensat. Nescit omnino, nescit, quid de spiritu angelico, quid de divino sentire debeat qui spiritum suum prius non cogitat. Si nondum idonea es redire ad te ipsam, quomodo ad illa rimanda idonea eris, quae sunt supra temetipsam; si nondum digna es intrare tabernaculum primum, qua fronte praesumes ingredi tabernaculum secundum⁶ »?

6. Si cupis elevari ad secundum et tertium caelum⁷, sit tibi transitus per primum, id est cor tuum; et qualiter hoc possis vel debeas facere, ecce, iam satis docui te superius; tamen et beatus Bernardus⁸ optime te informat dicens: « Integritatis tuae curiosus explorator, vitam tuam assidua discussione examina et cogita diligenter, quantum proficias et quantum deficias, qualis sis in moribus, qualis in affectibus, quam similis Deo vel quam dissimilis, quam prope vel quam longe ». — O quam magni periculi res est in homine religioso multa velle scire, et se ipsum nescire! O quam prope ille religiosus est perditioni et interitui, qui in cognoscendis rebus est curiosus, in iudicando aliorum conscientias sollicitus, se ipsum autem ignorat et nescit⁹! O Deus meus, unde in religioso tanta caecitas? Ecce, in promptu ratio est, audi: quia mens hominis *sollicitudinibus* distracta, non intrat ad se per *memoriam*; quia *phantasmatibus* obnubilata, non redit ad se per *intelligentiam*; quia *concupiscentiis illicitis* illecta, ad se nequaquam revertitur per *desiderium* suavitatis internae et laetitiae spiritualis; ideo totaliter in his sensibilibus iacens, non potest ad se tanquam ad Dei imaginem intrare, et sic totus miser se ipsum ignorat et nescit¹⁰. Omnibus ergo postpositis, tui ipsius habe memoriam et notitiam. Hoc etiam beatus Bernardus¹¹ orabat, dicens: « Deus det mihi non aliud scire, quam ut me ipsum cognoscam ».

De triplici caelo.

Periculum in religioso se ignorante.

¹ Ita D, F a secunda manu et rancorem, Vat. legit indignationem, et [BCDF hic omittunt et] ex corde rancorem.

² Ita BCDF, Vat.: tardus ad chorum, negligens in cantando, remissus in excutiendo torporem, dissolutus in colloquio, indevotus in Missa, tristis in facie et taediosus in cella.

³ Ita in Tract. de interiori domo (inter opera Bernardi), c. 36. n. 76. Post *per culpam* cum textu originali addidimus *quid esse debueris per industriam*. In principio Vat., contradicentibus textu originali et BCDF, legit *redeas ad te ipsam introrsus ad cor tuum et discas scopare spiritum tuum*.

⁴ Psalm. 76, 7. — Codd. B C pro *quomodo se* substituunt *quid*.

⁵ Respicitur Matth. 13, 44. de invento thesauro abscondito in agro. — Superius pro *scope* (ita etiam textus originalis) Vat. cum nonnullis codd. *scopa*; secundum Forcellini (in Appendice) utraque forma occurrit, et prima magis convenit cum Vulgata.

⁶ Ita Richard. a S. Vict., Hl. Beniamin maior c. 5. seq. Cfr. Tract. de interiori domo (cfr. supra nota 3.) c. 36. n. 76. Textus originalis superius post *ignorat* prosequitur *nescit, quam sub pedibus suis omnis mundana gloria iaceat, qui conditionis suae dignitatem non pensat* etc., et hic addit *hoc est in sancta sanctorum*. Cfr. tom. V. Itinerar. mentis in Deum, c. 5. n. 1, ubi distinguitur triplex modus contemplandi Deum,

scilicet *extra nos* per vestigium, *intra nos* per imaginem et *supra nos* per lumen, quod est signatum supra mentem nostram (cfr. Ps. 4, 7.), et subiungitur « qui exercitati sunt in primo modo intraverunt iam in *atrium* ante tabernaculum; qui vero in secundo, intraverunt in *sancta*; qui autem in tertio, intrant cum summo Pontifice in *sancta sanctorum* » (cfr. Exod. c. 25-28, ubi describitur tabernaculum). — Superius ex BCDF cum textu originali supplevimus *quomodo ad illa rimanda* [C *ruminanda*] *idonea eris, quae sunt supra temetipsam*.

⁷ Respicitur II. Cor. 12, 2. de raptu Pauli ad *tertium caelum*.

⁸ Meditat. etc. c. 5. n. 14; cfr. supra pag. 30, nota 4. Pro *explorator* BCDEF contra textum originale *operator*.

⁹ Cfr. supra Opusculum II. Soliloq. c. 1. n. 2. — Codd. BCF legunt *se ipsum autem nescit et ignorat et nescit penitus*.

¹⁰ August., 1. de Ordine, c. 1. n. 3: Cuius erroris maxima causa est, quod homo sibi ipse est incognitus. Qui tamen, ut se noscat, magna opus habet consuetudine recedendi a sensibus et animum in se ipsum colligendi atque in se ipso retinendi.

¹¹ Cfr. Sermon. 2. de Diversis, n. 1, ubi illa Augustini verba afferuntur: « Deus, noverim me, noverim te ». Ibid. Sermon. 40. n. 3. cognitio sui a Bernardo commendatur, de quo vide etiam Sermon. 36. in Cant. n. 5. seqq. et 37. n. 4. seqq. Vat. contra BCDF voci *scire* praefigit *facere* et.

CAPITULUM II.

De vera humilitate.

De essentia
et necessitate
humilitatis.

1. Verum quia defectus proprios cordis oculo contemplanti necesse est vere *humiliari sub potenti manu Dei*¹; ideo te, famulam Christi, admoneo, ut tuorum defectuum certa cognitione adepta, *valde humiliter spiritum tuum* et tibi ipsi vilescas. « Humilitas enim est virtus, ut dicit beatus Bernardus², quia homo verissima sui cognitione sibi ipsi vilescit ». Hac humilitate apud se ipsum viluit pater noster beatus Franciscus; *hanc amavit et exquisivit* ab initio religionis suae usque in finem; pro hac mundum reliquit, nudum se trahi per civitatem praecepit, leprosis servivit, peccata sua in praedicatione manifestavit, exprobrari sibi mandavit³. Hanc virtutem maxime a Filio Dei, mater Deo devota, discere debes, quia ipse dicit⁴: *Discite a me, quia mitis sum et humilis corde*. « Qui enim virtutes sine humilitate congregat in ventum pulverem portat », ut dicit beatus Gregorius. Sicut enim *principium omnis peccati est superbia*, sic fundamentum omnium virtutum est humilitas. Disce autem *veraciter* esse humilis, non fallaciter, sicut illi qui nequiter se humiliant, ut hypocritae, de quibus dicit Ecclesiasticus⁵: *Est qui nequiter se humiliat, et interiora eius plena sunt dolo*. « Verus enim humilis, ut dicit beatus Bernardus, semper vult vilis reputari, non humilis praedicari ».

Triplex via
pervenendi
ad humilitatem.
De prima
via.

2. Si igitur, mater dilectissima, ad perfectam humilitatem vis pervenire, oportet te per triplicem semitam incedere. — Prima semita est *consideratio Dei*. Debes enim considerare Deum ut auctorem

omnium bonorum; quia omnium bonorum est auctor, ideo sibi debemus dicere⁶: *Omnia opera nostra operatus es in nobis, Domine*. Et quia talis est, ideo sibi omne bonum debes tribuere et nihil tibi, considerans, quod non *fortitudo tua aut robur manuum tuarum*⁷ fecit bona, quae habes, quia *Dominus fecit nos, et non ipsi nos*. Et talis consideratio destruit totam superbiam eorum qui dicunt: *Manus nostra excelsa et non Dominus fecit haec omnia*. Haec superbia exclusit luciferum a caeli gloria. Non considerabat lucifer se de nihilo factum, sed potius aspiciebat suum decorem, suam pulcritudinem, qualiter *omnis lapis pretiosus operimentum eius*⁸, et extulit eum superbia cordis sui; et quia *superbum sequitur humilitas*, ideo statim deiectus est de sede nobilitatis suae in locum extremae vilitatis, et qui prius fuerat inter Angelos excellentissimus factus est inter daemones miserrimus.

Poenam
feri.

3. O quot sunt hodie luciferiani, imitatores et imitatrices luciferi, filii et filiae superbiae, quos patienter tolerat Dominus, cum tamen « tolerabilior sit superbia in divite quam in paupere », ut dicit Bernardus super Cantica⁹! Oportet ergo, ancillam Christi semper valde inveniri humilem, quae debet intrare in locum angeli repudiati. Humilitas enim sola placet Deo sive in Angelo sive in homine. Non credas, quod virginitas Deo placeat sine humilitate; certe nec Maria Dei mater fuisset effecta, si superbiam habuisset in se. Propterea dicit beatus Bernardus¹⁰: « Sine humilitate, audeo dicere, nec virginitas Mariae

Einse
imitato

¹ Epist. I. Petr. 5, 6; subinde respicitur Eccli. 7, 49. — Refragantibus BC, Vat. legit: *Verum qui vult defectus proprios cordis oculo contemplari, necesse* etc., et inferius pro *ut tuorum defectuum certa cognitione adepta* (ita BCF) ipsa substituit *ut cognitionem tuorum defectuum adepta*.

² De Gradibus humilitatis, c. 1. n. 2. Pro *cognitione* textus originalis *agnitione*.

³ Cfr. S. Bonav. Legenda S. Francisci, c. 2. (ubi de servitio leprosororum) et c. 6, ubi alia facta humilitatis narrantur. Vide etiam Thom. a Celano, Vita II. p. III. c. 79. [Respicitur Sap. 8, 2.]. — Ex BCDF supplevimus *nudum... mandavit*. Superius pro *Hac humilitate apud se ipsum viluit* (ita BCDF) Vat. *Hac vilitate viluit*. Subinde post *religionis* BCF omittunt *suae*, et loco pro *hac* (ita BC) Vat. substituit *per hanc*.

⁴ Matth. 11, 29. — Sententia Gregorii habetur I. Homil. in Evang. homil. 7. n. 4, ubi pro *pulverem portat* (ita BCF cum textu originali) Vat. *paleas mittit*. — Eccli. 10, 15: *Initium omnis peccati est superbia*.

⁵ Cap. 49, 23, post quem Bernard., Serm. 16. in Cant. n. 10.

⁶ Isai. 26, 12, ubi pro *in nobis* Vulgata *nobis*. — Superius fide BCF supplevimus *quia omnium bonorum est auctor*.

⁷ Deut. 8, 17. seq.: Ne diceris in corde tuo: *Fortitudo mea et robur manus meae haec mihi omnia praesiterunt*, sed recorderis Domini Dei tui, quod ipse vires tibi praebuerit etc. — Sequuntur Ps. 99, 3. et Deut. 32, 27, ubi Vat. contra Vulgatam et codd. ABCDEF *Manus nostrae excelsae*. Cfr. August., Enarrat. in Ps. 106. n. 15. — Inferius pro *talis cogitatio* ex CDF substituimus *talis consideratio*.

⁸ Ezech. 28, 43. Cfr. Bernard., de Gradibus superbiae, c. 10. n. 31. seqq. — Subinde allegatur Prov. 29, 23, in quo Vat., refragantibus BCDF cum Vulgata, substituit *superbiam pro superbum*.

⁹ Serm. 54. n. 8; cfr. supra pag. 54, nota 9. — Inferius CF omittunt *semper*.

¹⁰ Homil. 1. super *Missus est*, n. 5. Cfr. Tract. de Moribus et officio episc. (alias Epist. 42.) c. 5. n. 17: *Humilitas ergo virtutes alias accipit* (cfr. Iac. 4, 6.). *Servat acceptas... Servatas consummat... Inimicam omnis gratiae omnisque initium peccati debellat superbiam et tam a se quam a ceteris virtutibus superbam illius propulsat tyrannidem... Sola denique est, de qua omnium plena virtutum Maria gloriandum esse putavit... Respexit, inquiens, Deus humilitatem ancillae suae* [Luc. 1, 48.]. Cfr. tom. VII. pag. 432, nota 4. Pro *nec virginitas Mariae* (ita BCF cum textu originali) Vat. *nec Maria*.

Deo placuisset »; et ideo magna virtus est, sine cuius obtentu non solum virtus non est, sed etiam in superbiam erumpit.

4. Secunda semita est *rememoratio Christi*. Rememorari debes, quod Christus humiliatus fuit usque ad vituperabilissimum genus mortis¹ et in tantum factus est humilis, ut quasi leprosus reputaretur — unde dixit Isaias propheta: *Reputavimus eum quasi leprosum et a Deo humiliatum* — immo in tantum fuit humiliatus, ut tempore ipsius nihil eo vilis reputaretur. Unde idem Isaias dicit: *In humilitate iudicium eius sublatum est*; ac si diceret: tanta fuit eius humilitas, tantum se deiecerat, ut nullus de eo daret rectum iudicium, ut a nullo crederetur esse Deus. *Si ergo ipse Dominus noster et magister*² inquit: *Non est servus maior domino suo, et discipulus non est super magistrum*; si ancilla Christi es, si discipula Christi es, vilis et contemptibilis esse debes et humilis. — O quam abominabilis est ille religiosus Deo, qui vestem fert humilem et cor superbum! O quam inutilis est ille Christianus, qui Dominum suum videt humilem et despectum, et ipse exaltat cor suum et ambulat in magnis et in mirabilibus super se!³ Quid amplius detestandum in sponsa Christi, quid gravius puniendum in ancilla Christi, quam quod, postquam summus factus est imus, immensus parvus et homo, putredo et vermis apponat se magnificare? De talibus dicit beatus Augustinus⁴: « O pellis morticina, quid extenderis? o sanies foetida, quid inflaris? Caput humile, et membrum superbum »? quasi dicat: non decet.

5. Tertia semita, per quam debes incedere, si vis ad perfectam humilitatem pervenire, est *circumspectio tui*. Tunc te ipsam, carissima mater, circumspecis, quando recogitas, unde veneris, aut quo va-

dis⁵. — Considera ergo, unde veneris, et scias, quia de massa perditionis et de pulvere et limo terrae facta es et in peccatis conversata et exsul es de beatitudine paradisi. Et haec consideratio spiritum tumoris abiicit et excludit in tantum, ut clamare incipias cum tribus pueris in Daniele⁶: *Sumus hodie humiles in universa terra propter peccata nostra*. — Considera etiam illud, quo tendis; tendis enim ad corruptionem et incinerationem, quia *pulvis es et in pulverem reverteris*⁷. Quid igitur superbis, terra et cinis? Si hodie es, cras non eris; si hodie sana, cras infirmaberis forte; si hodie sapiens, cras forte stulta eris; si hodie dives in virtutibus, cras forte mendica eris et misera. Quis ergo miser ille Christianus, qui audeat superbire, cum tantis miseriis et calamitatibus undique se videat circumdatum?

6. Discite igitur, o virgines sacratae, humilem habere spiritum, humilem incessum, humiles sensus, humilem habitum; sola enim humilitas est, quae divinam mitigat iram, quae divinam invenit gratiam. *Quanto enim magnus es, humilia te in omnibus*, dicitur in Ecclesiastico⁸, *et coram Deo invenies gratiam*. Hoc modo Maria invenit gratiam apud Dominum, sicut ipsa testatur dicens: *Respexit humilitatem ancillae suae*. Nec mirum, quia humilitas caritati locum praeparat, mentem a vanitate evacuat. Propter quod dicit Augustinus⁹: « Quanto sumus a tumore superbiae inaniore, tanto sumus dilectione pleniores ». Et sicut aqua confluit ad valles, sic gratia Spiritus sancti confluit ad humiles; et sicut aqua tanto fortius fluit, quanto magis descendit, sic qui toto corde humiliatus procedit magis propinquat ad Dominum, ut impetret gratiam. Propterea dicit Ecclesiasticus¹⁰: *Oratio humiliantis se nubes penetrat*,

Consideratio prima.

Secunda.

Hortatio ad sacras virgines.

¹ Phil. 2, 8: Humiliavit semetipsum factus obediens usque ad mortem, mortem autem crucis. — Duo seqq. loci sunt Isai. 53, 4. et 8, qui exhibetur secundum Septuaginta (cfr. Act. 8, 33.), dum Vulgata legit: De angustia et de iudicio sublatus est. Cfr. Bernard., Serm. in feria 4. hebdomad. sanctae, n. 3. — Inferius vocibus tempore ipsius secunda manus in F interse-ruit passionis.

² Ioan. 13, 14; ibid. v. 16: Non est servus maior domino suo; Matth. 10, 24: Non est discipulus super magistrum. — Vat. contra B C D F legit: Si ergo ipse Dominus et magister noster ita vilis et contemptibilis reputatus est, et non est servus etc., et inferius qui vestem sumit pro qui vestem fert.

³ Psalm. 130, 1: Domine, non est exaltatum cor meum... neque ambulavi in magnis neque in mirabilibus super me. — Inferius respicitur Ps. 10, (secundum Ihebraeos, in Vulgata Ps. 9.) 18: Iudicare pupillo et humili, ut non apponat ultra magnificare se homo super terram. Bernard., Serm. 1. in Nativ. Domini, n. 4: Quid enim magis indignum, quid detestandum amplius, quid gravius puniendum, quam ut videns Deum caeli parvulum factum ultra apponat homo magnificare se super terram? Intolerabilis impudentiae est, ut, ubi sese exinavit Maiestas, vermiculus inflatur et intumescat.

⁴ Serm. 304. (alias 37. de Diversis vel Serm. 3. in sole-

mnitate Laurentii martyris) c. 4. n. 3. Textus originalis substituit *tenderis* pro *extenderis* et omittit *caput humile, et membrum superbum*, quod tamen exhibetur a Petro Lombardo et a Glossa ordinaria apud Lyrannum in Phil. 2, 8. — Inferius pro *quasi dicat* B C F *quasi diceret*.

⁵ Cfr. supra pag. 30, nota 1.

⁶ Cap. 3, 37. — Superius post *Et haec consideratio* B prosequitur *circumspectionis vires tumoris abiicit* etc.

⁷ Gen. 3, 19. Pro *reverteris* B C F *ibis* (Septuaginta: Quia terra es et in terram ibis). — Sequitur Eccli. 10, 9, ubi pro *superbis* Vulgata *superbit*. Ibid. v. 12: Rex hodie est et cras morietur. — Inferius pro *sana... mendica... et misera* (ita B C D F) Vat. *sanus... mendicus... et miser*.

⁸ Cap. 3, 20. — Subinde allegatur Luc. 1, 48.

⁹ Libr. VIII. de Trin. c. 8. n. 12, ubi pro *inaniore* textus originalis substituit *saniores*. Cfr. tom. VII. pag. 244, nota 7.

¹⁰ Cap. 35, 21, post quem Ps. 144, 19. — De *vallibus* humiles significantibus cfr. tom. VI. pag. 290, nota 13. — Superius pro *tanto fortius fluit, quanto magis descendit* (ita C D F) Vat. *quanto fortius fluit, tanto magis descendit*, pro *toto corde humiliatus* B C D F *toto* [D F de toto] *corde humiliato*, et pro *ut impetret* (ita B C D F) Vat. *et impetret*.

et donec appropinquet ad Altissimum, non consolabitur, quia Dominus timentium se faciet voluntatem et deprecationem eorum exaudiet.

7. Sitis ergo, o famulae Dei, o ancillae Christi, humiles, ita ut nunquam superbiam in cordibus vestris dominari permittatis¹, quia magistrum habuistis humilem, scilicet Dominum nostrum Iesum Christum, et quia magistram habuistis humilem, scilicet Virginem Mariam, reginam omnium. Sitis humiles, quia patrem habuistis humilem, scilicet beatum Franciscum; sitis humiles, quia matrem habuistis humilem, scilicet beatam Claram, humilitatis exemplar. — Sic tamen sitis humiles, ut testis humilitatis vestrae sit *patientia*. Virtus enim humilitatis per patientiam perficitur, neque est vera humilitas, cui non est adiuncta patientia. Et hoc bene testatur beatus Augustinus² dicens: «Facile est velum ante oculos ponere, vestes viles et despectas habere, demisso capite incedere; sed verum humilem probat patientia», iuxta illud Ecclesiastici: *In humilitate tua patientiam habe*. — Sed heu, cum dolore loquor, multi sumus, qui volumus superbire in claustro, qui certe non nisi humiles fuimus in mundo. Unde beatus Bernardus³ dicit: «Video, quod multum doleo, post spretam saeculi pompam nonnullos in schola humilitatis superbiam magis addiscere ac sub alis mitis humilisque magistri gravius insole-

scere et impatientes amplius fieri in claustro, quam fuissent in saeculo; quodque magis perversum est, plerique in domo Dei non patiuntur haberi contemptui, qui in sua non nisi contemptibiles esse potuerunt».

8. Consulo ergo tibi, dilecta mater, consule filiabus tuis, consule virginibus⁴ Deo sacratis, ut virginitatem in humilitate et humilitatem in virginitate conservent. Est enim virginitas mixta humilitati sicut gemma auro superaddita. Propterea beatus Bernardus dicit⁵: «Pulchra permixtio virginitatis cum humilitate. Non mediocriter placet Deo ista anima, in qua humilitas commendat virginitatem, et virginitas humilitatem exornat». — Audi denique consilium fratris tui⁶, audi mater, et placebit tibi. Fuge superbas famulas velut viperas, sperne superbas virgines tanquam daemones, contemne societatem superbiorum velut virus mortiferum. Et quare hoc? Audi quare. Quidam sapiens⁷ ita describit superbum dicens: «Omnis superbus intolerabilis, habitu superfluus, in incessu pomposus, cervix erecta, facies torva, truces oculi, de loco superiori decertat, praeferri se melioribus affectat, sententias et verba et facta iactat, reverentiam in obsequio non servat». Propterea debes, famula Dei, sponsa Christi, virgo Domini, fugere superbiorum consortia, ne et tu eis similis efficiaris. Dicit enim Ecclesiasticus⁸: *Qui communicat superbo induet superbiam*.

CAPITULUM III.

De perfecta paupertate.

1. Est etiam paupertas virtus ad perfectionis integritatem necessaria in tantum, ut nullus omnino sine ea possit esse perfectus, teste Domino, qui dicit in Evangelio⁹: *Si vis perfectus esse, vade et vende omnia, quae habes, et da pauperibus*. Cum enim

summa evangelicae perfectionis consistat in excellentia paupertatis, non credat, se apprehendisse perfectionis apicem, qui nondum imitator perfectus factus est evangelicae paupertatis. Ait namque Hugo de sancto Victore¹⁰: «Quidquid perfectionis in religiosis

¹ Tob. 4, 14: Superbiam nunquam in tuo sensu, aut in tuo verbo dominari permittas. — Inferius pro *et quia dominam* (ita BCF) Vat. *et quia dominam*.

² Epist. 17. in Appendice (alias 142; est Pelagii ad Deme- triadem et invenitur etiam in Append. operum Hieron. Epist. 4.), c. 20: Perfacile est enim, aliquem vestem habere contemptam, salutare submissius, manus et genna deosculari, inclinato in terram capite oculisque deiectis humilitatem ac mansuetudinem polliceri... Verum humilem patientia ostendit iniuriae. — Sequitur Eccli. 2, 4.

³ Homil. 4. super *Missus est*, n. 10. Textu etiam originali repugnante, post *doleo* AE addunt *quia*, et pro *impatientes* BCF substituant *insolentes*. — Superius vocibus *volumus superbire* BCF interserunt *nisi*.

⁴ Val., refragantibus BCF: *Consulo ergo tibi, o praedilecta soror* [cfr. supra pag. 107, nota 7.], *consulo et virginibus*.

⁵ Homil. 1. super *Missus est*, n. 5.

⁶ Codd. BCF *fili tui*.

⁷ Libr. III. de Vita contemplativa (inter opera Prosperi, est tamen Iuliani Pomerii, qui claruit circa an. 498), c. 8. n. 4.

seq., ubi indicia superbiae describuntur: Omitto illos quos etiam ipse habitus et incessus superbos ostendunt, quorum erecta cervix, facies torva, truces oculi et sermo terribilis nudam superbiam clamant... Illos tantum dolendos ostendo... quos iam conversos et aliquantulum proficientes superbia occulte captivat... Ipsa in cordibus talium locum diabolo facit... Inde est, quod hi... de loco superiori disceptant, praeferri se etiam melioribus impudenter affectant... suas sententias procaciter iactant... non servant in obsequio reverentiam, in sermone modestiam, in moribus disciplinam etc. Codd. CF legunt: *Quidam sapiens ita describens superbum dicit*.

⁸ Cap. 13, 1.

⁹ Matth. 19, 21. — Superius pro *paupertas virtus* C F *paupertatis virtus*.

¹⁰ Sententiam ipsam non invenimus; cfr. tamen Exposit. in regul. S. August. c. 1. et 2, ubi paupertas religiosis proponitur tenenda in ipsaque eis gloriamdum. Eucherius Lugdun. episc. (†450), Homil. 4. ad Monachos ait: «*Peculiaris* autem istud ad professionem nostram pertinet, nihil in hac vita consolationis requirere... paupertatem studio quaerere et non solum

reperiri poterit, nec tamen aestimetur perfectionis integritas, nisi diligatur paupertas ».

2. Sunt autem duo, quae quemlibet religiosum, immo quemlibet¹ hominem movere debent ad amorem paupertatis. Primum est *divinum exemplum*, quod est irreprehensibile; secundum est *divinum promissum*, quod est inaestimabile.

Primum, dico, quod te, fanulam Christi, movere debet ad amorem paupertatis, amor est et exemplum² Domini nostri Iesu Christi. Ipse enim fuit pauper *nascendo*, pauper *conversando*, pauper *moriendo*.

3. Vide, quale *exemplum paupertatis* tibi reliquit, ut suo exemplo paupertatis amica efficiaris. Pauper fuit Dominus noster Iesus Christus *nascendo* in tantum, ut nec haberet hospitium nec vestimentum nec alimentum, sed pro hospitio habuit stabulum, pro vestimento vilem panniculum, pro alimento lac virgineum. Unde Apostolus Paulus hanc considerans paupertatem suspirans exclamavit, dicens ad Corinthios³: *Scitis gratiam Domini nostri Iesu Christi, qui, cum esset dives, pro nobis egenus factus est, ut eius inopia divites essemus*. Et beatus Bernardus⁴ dicit: « Bonorum omnium aeterna affluentia in caelis suppetebat, sed paupertas non inveniebatur in eis. Porro in terris abundabat et superabundabat haec species, et nesciebat homo pretium eius. Hanc itaque Filius Dei concupiscens descendit, ut eam sibi eligat nobisque sua aestimatione faciat pretiosam ».

4. Praebuit etiam se nobis in exemplum paupertatis Dominus noster Iesus Christus *conversando in mundo*. Audi, virgo beata, audite omnes, qui professi estis paupertatem, quam pauper Filius Dei, Rex Angelorum, fuerit, dum vixit in mundo. In tantum fuit pauper, quod aliquoties hospitium habere non potuit, sed cum suis Apostolis multoties extra civitatem et villas dormire oportuit. Propterea dicit

Marcus evangelista⁵: *Circumspectis omnibus, cum iam vespera esset hora, exiit in Bethaniam cum duodecim*. Super hoc verbo dicit Glossa: « *Circumspectis*, si quis eum hospitio susciperet, quia tantae erat paupertatis et ita nulli adulatus, ut in tanta urbe nullum hospitium inveniret ». Et Matthaeus⁶ dicit: *Vulpes foveas habent et volucres caeli nidos, Filius autem hominis non habet, ubi caput suum reclinet*.

5. Non solum Dominus Angelorum fuit pauper nascendo, non solum fuit pauper conversando, verum etiam, ut ad amorem paupertatis nos accenderet, fuit pauperrimus *moriendo*. O vos omnes, qui vovistis paupertatem, *attendite et videte*⁷, quam pauper ille dives Rex caelorum propter nos factus fuerit tempore mortis suae! Fuit enim spoliatus et privatus omnibus, quae habuit; fuit, inquam, spoliatus *vestibus*, quando *diviserunt vestimenta sua et super vestem suam miserunt sortem*⁸. Fuit etiam spoliatus *corpore et anima*, quando per acerbissimae mortis passionem anima ipsius de corpore eiecta fuit. Fuit etiam spoliatus *divina gloria*, quando ipsum *non sicut Deum glorificaverunt*⁹, sed tanquam maleficum tractaverunt, sicut ipse Iob undevigesimo conqueritur: *Spoliaverunt me gloria mea*. De tantae paupertatis exemplis loquitur beatus Bernardus¹⁰, dicens: « Videte pauperem Christum natum sine hospitio, iacentem inter bovem et asinum in praesepio, involutum vili panniculo, fugientem in Aegyptum, sedentem in asino, pendentem nudum in patibulo ».

6. Quis igitur ille miser Christianus, quis ille desperatus et obturatus religiosus, qui adhuc divitias amet, qui paupertatem abhorreat, cum videat et audiat Deum deorum, Dominum mundi, Regem caeli, Unigenitum Dei tantae paupertatis sustinuisse defectum? « Magna utique, ut dicit beatus Bernardus¹¹,

facultates, sed etiam ipsas cupiditates e cordibus eradicare; nihil enim habere interdum res necessitatis est, nihil vero cupere, res virtutis; et ideo hunc sibi specialiter modum religiosus debet imponere, ut tantum habeat, quantum necessitas poscit, non quantum cupiditas concupiscit... et nisi ex corde atque affectu pauper sis, paupertas ipsa non virtus, sed miseria iudicanda est ». Hieron., Epist. 14. (alias 4.) n. 6, Heliodoro monacho scribit: « Perfectus autem servus Christi nihil praeter Christum habet; aut si quid praeter Christum habet, perfectus non est ». Cfr. Bernard., Serm. 27. de Diversis n. 3. Voci Hugo C F praefigit *magister*. In ipsa sententia pro *reperiri poterit* B C D F substituunt *reperiri potest*, et pro *aestimetur* ponunt *insumitur*.

¹ Ex B C D F supplevimus *immo quemlibet*.

² Aliqui codd. omittunt *amor*, alii *est et exemplum*.

³ Epist. II. c. 8, 9, ubi Vulgata *propter vos et essetis loco pro nobis et essemus*.

⁴ Serm. 4. in Vigilia Nativit. Domini, n. 5. Codd. B C D F omittunt *Porro in terris... pretium eius; pro eligat et faciat* (ita etiam textus originalis) Vat. *eligeret et faceret*.

⁵ Cap. 11, 11. — Glossa est *interlinearis* apud Lyrannum ex Beda in hunc loc. Cfr. tom. V. pag. 437, nota 5.

⁶ Cap. 8, 20. Expositionem vide tom. V. pag. 425, nota 7. et 9.

⁷ Thren. 1, 12. — Inferius pro *propter nos* B C *propter vos*.

S. Bonav. — Tom. VIII.

⁸ Matth. 27, 35; cfr. Ps. 21, 19. — Superius ex B C D F supplevimus *et privatus... spoliatus*; pro *quando diviserunt* B D F substituunt *quoniam diviserunt*.

⁹ Rom. 1, 21. — Sequitur Iob 49, 9: *Spoliavit me gloria mea*. — Pro *tanquam maleficum* (ita B C D F) Vat. *tanquam maledictum*.

¹⁰ Serm. 3. in Tempore Resurrectionis, n. 1: Descendit ab inenarrabilibus caeli divitiis, et veniens in mundum, nec istas qualescumque divitias habere voluit, sed in tanta paupertate venit, ut natus continuo poneretur *in praesepio, quia ei non erat locus in diversorio* [Luc. 2, 7.]. Denique quis nesciat, quoniam *Filius hominis non habebat, ubi caput suum reclinare* [Luc. 9, 58.]? Ibid. n. 2: Invenies Christum Dominum vilibus pannis involutum, factum opprobrium hominum et abiectionem plebis [cfr. Ps. 21, 7.]. Cfr. August., Serm. 14. (alias 110. de Tempore) c. 7. n. 9: In angusto diversorio nascitur, involutus infantilibus tegumentis in praesepio ponitur, sit cibaria iumentis pauperibus; deinde caeli et terrae Dominus... vagit, nutritur, crescit... postea tenetur, contemnitur... ligno suspenditur, lancea perforatur. O paupertas! Ecce caput pauperum etc.

¹¹ Loc. cit. n. 1. Pro *vermiculus vilis, propter quem* (ita B C F cum textu originali) Vat. *pauper, cum*. — Superius pro *desperatus et obturatus religiosus* (ita C D F) Vat. *despectus religiosus*, et pro *sustinuisse defectum* C *sustinuisse defectus*.

abusio est et nimis magna, ut dives esse velit vermiculus vilis, propter quem Deus maiestatis et Dominus Sabaoth voluit pauper fieri ». « Quaerat divitias paganus, qui sine Deo vivit; quaerat divitias Iudaeus, qui terrenas promissiones accepit »¹; sed tu virgo Christi, tu ancilla Domini, qua mente quaeris divitias, cum paupertatem voveris, cum inter pauperes Iesu Christi vivas, cum pauperis patris Francisci velis esse filia, cum pauperis matris Clarae promiseris esse imitatrix? Supra modum, mater carissima, tua ac mea confunditur avaritia, quia, cum simus professores paupertatis, paupertatem avaritia commutamus, appetentes quae non licent, appetentes quae regula prohibet, cum tamen Filius Dei *pro nobis egenus factus sit*².

Commenda-
tio paupertatis.

7. Scio, quod ita sit, quod quanto ferventiores professae paupertatis fueritis amatrices, quanto perfectiores evangelicae paupertatis fueritis imitatrices, tanto magis bonis omnibus tam temporalibus quam spiritualibus abundabitis. Si autem ad contrarium vos converteritis, si paupertatem, quam professae estis, contempseritis; omnium bonorum tam temporalium quam spiritualium egentes eritis. Illa quondam pauper genitrix pauperis Iesu Maria dicit³: *Esurientes implevit bonis et divites dimisit inanes*. Hoc etiam testatur Propheta ille sanctissimus, dicens: *Divites equeverunt et esurierunt, inquirentes autem Dominum non minuentur omni bono*. Nunquid non legistis, nunquid non audistis Dominum Iesum loquentem Apostolis suis in Evangelio Matthaei⁴ et dicentem: *Nolite solliciti esse dicentes: Quid manducabimus, aut quid bibemus? Scit enim Pater vester, quid vobis necesse sit*. Audi iterum, quid dicit eis in Evangelio Lucae: *Quando nisi vos sine sacculo et pera et calceamentis, nunquid aliquid defuit vobis? At illi dixerunt: Nihil*. Si igitur inter Iudaeos duos et incredulos pascebat Dominus discipulos suos sine omni sollicitudine; quid mirum, si pascat Fratres Minores eiusdem perfectionis professores, quid mirum, si pascat pauperes Sorores, paupertatis evangelicae imitatrices, inter populos christianos et fideles? *Omnem itaque sollicitudinem*

*vestram proicite in eum, quoniam ipsi cura est de vobis*⁵.

8. Cum igitur tanta sit Dei Patris circa nos sollicitudo, tanta sit sibi cura de nobis; mirum videtur, cur istis temporalibus, cur istis rebus curiosis et defectibilibus tanta occupatione sollicitamur. Certe aliam causam non invenio nisi matrem confusionis et damnationis avaritiam; aliam causam non reperio, nisi quia affectiones nostrae longe recesserunt a Deo salutari nostro⁶; alia causa non est, nisi quia fervor divinae caritatis refriguit et congelatus est in nobis. Certe, si essemus bene ferventes, nudi nudum Christum sequeremur⁷. Nam homines, cum magnum aestum habent, consueverunt se denudare et spoliare. Signum magnae frigiditatis est in nobis, quia ita attrahimus nobis ista temporalia. O Deus meus! quomodo possumus esse ita duri contra Christum, qui *exivit de terra sua*, id est de caelis, *et de cognatione sua*, id est de Angelis, *et de domo Patris sui*⁸, id est de sinu Patris, et factus est pro nobis pauper, abiectus et despectus? Et nos nolumus pro eo relinquere unum miserum et foetidum mundum? Corpore quidem relinquimus mundum, sed huiusmodi totum cor, tota mens, totum desiderium nostrum occupatur et absorbetur a mundo.

9. O beata Dei famula, recordare paupertatis pauperis Domini nostri Iesu Christi, imprime cordi tuo paupertatem pauperis patris tui Francisci, memorare paupertatis matris tuae Clarae et toto studio, toto conamine inhaere paupertati, amplectere dominam paupertatem nec aliud sub caelo pro nomine Domini diligere⁹ velis quam paupertatem, non honorem, non aliquas res temporales, non divitias; sed paupertatem sanctam, quam vovisti, cura firmiter observare. Divitias enim habere et amare infructuosum est, amare et non habere periculosum est, habere autem et non amare laboriosum est. Igitur nec habere divitias nec amare utile est, securum est, delectabile est et actus virtutis perfectae; et ideo tam consilium Domini de paupertate¹⁰ quam exemplum omnem Christianum movere debet et accendere ad amorem paupertatis. O beata paupertas,

Contra
ritiam
giosoru

Exhor
ad paup
tem.

¹ Bernard., Serm. 1. in festo Omnium Sanctorum, n. 7, et additur: sed qua fronte, magis autem qua mente Christianus divitias quaerit, postquam Christus beatos esse pauperes praedicavit? — Inferius vocibus *qua mente* F praefigit *qua fronte*.

² Epist. II. Cor. 8, 9; cfr. supra pag. 113, nota 3. — Superius pro *paupertatem avaritia commutamus* (ita BCF) Vat. *paupertatem in avaritiam commutamus*, et dein prosequitur *quae non licet appetentes* [D addit *et*], *quae regula* etc.

³ Luc. 1, 53. — Sequitur Ps. 33, 11. — Superius pro *Illam quondam* (ita B C D F) Vat. *Illam enim*.

⁴ Cap. 6, 31. seq. — Subinde allegatur Luc. 22, 35. seq.

⁵ Epist. I. Petr. 5, 7. — Superius pro *incredulos* (ita B C D F) Vat. *crudeles*, quae etiam, refragantibus BCF, omittit *eiusdem perfectionis professores, quid mirum, si pascat*.

⁶ Respicitur Deut. 32, 15, ubi de populo Iudaico dicitur: Incrassatus est dilectus et recalcitravit, incrassatus, impinguitus, dilatus dereliquit Deum factorem suum et recessit a Deo salutari suo. — In seq. propositione respicitur Matth. 24, 42: Refrigescet caritas multorum. — Superius ex B C D F supplevimus *nisi matrem... non reperio*.

⁷ Hieron., Epist. 125. (alias 4.) n. 20: Nudum Christum nudus sequere. Cfr. tom. V. pag. 126, nota 4, ubi similis sententia Hieronymi allata est.

⁸ Gen. 12, 1. Abram dicitur: Egredere de terra tua et de cognatione tua et de domo patris tui.

⁹ Ex BCF supplevimus *diligere*, et inferius fide B C D F addidimus *non aliquas res temporales*.

¹⁰ Cfr. supra n. 1. — Inferius B C omittunt et accendere; deinde post *securum* cum D F omisimus *Deo*, et iidem cum B pro *amatorem tuum* substituunt *amatorem lui*.

quam amabilem Deo, quam securum in mundo reddis amatorem tuum! « Qui enim, ut dicit Gregorius¹, nihil habet in mundo, quod diligat, nihil est in mundo, quod pertimescat ». Unde legitur in Vitis Patrum², quod quidam pauper frater habebat unam mattam, de medietate se cooperiebat in nocte et alteram medietatem sibi submittebat. Quodam autem tempore, cum esset validum frigus, Pater monasterii de nocte exiens audivit eum dicentem: Gratias ago tibi, Domine, quia quot, quot sunt divites in custodia, et qui in ferro sedent, aut ferro vinculati sunt, aut pedes habent in ligno constrictos! Ego autem velut imperator sum, extendens pedes meos, et quo volo, ambulo. — Sic ergo habes primum, scilicet *exemplum paupertatis*.

10. Secundum, quod te ad amorem paupertatis accendere debet, est *divinum promissum*, quod est inaeestimabile. O *dives in omnes*³, o bone Domine

Iesu, quis potest digne verbo exprimere, corde percipere, manu scribere illam caelestem gloriam, quam tuis pauperibus te daturum promisisti? Ipsi enim paupertate voluntaria merentur « gloriae Conditoris assistere⁴ », ipsi merentur *intrare in potentias Domini*, in illa aeterna tabernacula, in illas lucidissimas mansiones. Ipsi merentur fieri cives illius civitatis, cuius artifex et conditor est Deus. Tu enim ore tuo benedicto promisisti eis, dicens⁵: *Beati pauperes spiritu, quoniam ipsorum est regnum caelorum*. Non aliud est, Domine Iesu Christe, *regnum caelorum* quam tu ipse, qui es *Rex regum et Dominus dominantium*. Te ipsum dabis eis in praemium, in mercedem et in gaudium. Ipsi te fruentur, de te gaudebunt, de te satiabuntur. *Edent enim pauperes et saturabuntur et laudabunt Dominum qui requirunt eum, vivent corda eorum in saeculum saeculi*. Amen.

CAPITULUM IV.

De silentio et taciturnitate.

1. Non mediocriter cooperatur ad perfectionem religioso homini virtus silentii, quia, sicut *in multiloquio non deerit peccatum*⁶, sic breviter et raro loqui ad hoc valet, ut homo caveat sibi a peccato. Et sicut ex nimia loquela frequenter sequitur iniuria tam Dei quam proximi, sic ex silentio nutritur iustitia, ex qua velut ex quadam arbore colligitur fructus pacis. Unde cum claustralibus pax sit summe necessaria, valde necessarium est eis silentium, per quod pax eis tam cordis quam corporis conservatur. Propterea Isaias propheta, virtutem silentii considerans, ait⁷: *Erit opus iustitiae pax et cultus iustitiae silentium*; quasi dicat: tantae virtutis est silentium, quod in homine conservat Dei iustitiam et inter proximos pacem nutrit et custodit. Nisi enim homo valde diligenter *ori suo adhibeat custodiam*⁸,

et bona gratuita, quae habet, cito dissipat et etiam in multa mala corrumpit. *Lingua quidem*, ut dicit beatus Iacobus in Canonica sua⁹, *modicum membrum est et magna exaltat*; et sequitur: *Lingua nostra ignis est, universitas iniquitatis*, ubi dicit Glossa, quod « per eam pene cuncta facinora concinnantur, aut patrantur ». Vis audire, o famula Dei, vis scire, quanta mala ex lingua prodeunt, si diligenter non custodiatur? Audi, et dicam. Ex lingua prodeunt blasphemia, murmuratio, peccati defensio¹⁰, periurium, mendacium, detractio, adulatio, maledictio, convitium, contentio, bonorum derisio, pravum consilium, rumor, iactantia, secreti revelatio, indiscreta comminatio, indiscreta promissio, multiloquium, scurrilitas. In veritate magna confusio est sexui femineo et magnum dedecus est sacris virginibus non

De malis linguarum male custodiatis.

¹ Libr. X. Moral. c. 21. n. 39; cfr. supra pag. 44, nota 3.

² Cfr. Vita Ioan. Eleemosynarii, c. 20, ubi coopertorium [mattam] habentes subtus dimidium et supra dimidium, et non possunt extendere pedes suos » etc. Idem exemplum affertur a Guil. Peraldo, Sum. virtutum ac vitiorum, tom. I. p. V. de Beatitudinibus, p. V. de Paupertate, qui tamen pro *quia quot, quot sunt divites in custodia, et qui in ferro sedent, aut ferro vinculati sunt* substituit *quot sunt modo divites in custodia et qui in inferno sedent*. Vat., refragantibus BCF, omittit *Quodam autem tempore... exemplum paupertatis*.

³ Rom. 10, 12. — Inferius pro *verbo CF verbis*, et pro *percipere BCF concipere*.

⁴ Secundum Gregor. supra pag. 62, nota 3. allatum. — Sequitur Ps. 70, 46: *Intraibo in potentias Domini*.

⁵ Math. 5, 3. — Duo seqq. loci sunt I. Tim. 6, 45. et Ps. 24, 27.

⁶ Prov. 10, 19. — Superius pro *religioso CDF in religioso*. Inferius pro *Et sicut ex nimia* (ita BCF) Vat. *Pro nimia*.

⁷ Cap. 32, 17. Cfr. Gregor., VII. Moral. c. 47. n. 58; Bernard., Epist. 89. n. 2. et Epist. 385. (alias 341.) n. 3. seq.

⁸ Respicitur Ps. 38, 2: *Posui ori meo custodiam*. Cfr. Ps. 140, 3: *Pone, Domine, custodiam ori meo*. Eccli. 22, 33: *Quis dabit ori meo custodiam et super labia mea signaculum certum, ut non cadam ab ipsis, et lingua mea perdat me?* — Vat., contradicentibus BCF, legit: *Nisi homo diligentem ori suo adhibeat custodiam*.

⁹ Cap. 3, 5, et 6. — Glossa ordinaria (ex Beda) in hunc locum: *Universitatem* dicit, quia per eam cuncta fere facinora aut concinnantur, ut latrocinia, stupra, aut patrantur, ut periuria, falsa testimonia, aut defenduntur, ut cum quilibet impurus excusando scelus, quod admisit, simulat bonum, quod non fecit.

¹⁰ Ita BCF, *D dissensio*, Vat. *dissensiones*.

habere *oris custodiam*, non servare linguae disciplinam, cum tanta mala per linguae inquietudinem committantur. Certe audeo dicere: frustra ille religiosus gloriatur de possessione virtutis in corde, qui dissipat disciplinam silentii per inquietudinem multiloquii. *Si quis enim, teste Scriptura¹, putat, se religiosum esse, non refrenans linguam suam, sed seducens cor suum; huius vana est religio.*

Exemplum
taciturnitatis
in B. V. M.

2. O lesu Christi sponsae amabiles, intuemini dominam vestram atque meam, intuemini virtutum speculum Mariam et discite ab ea silentii disciplinam! Quantae taciturnitatis fuerit beata Virgo, satis patet. Si enim percurramus Evangelium², perpauca et cum paucis eam locutam invenimus. Cum quatuor tantum personis legimus eam habuisse sermonem et non nisi septem verba eam locutam fuisse: cum Angelo duo, cum Filio suo duo, cum Elisabeth duo, cum ministris in nuptiis unum tantum verbum. In hoc confunditur nostra loquacitas, qua proni sumus ad multiplicationem verborum, cum tamen magna sit utilitas silentii.

Duplex utili-
tas silentii.

3. Una utilitas est, quia *inducit compunctionem*. Homo, cum tacet, cogitat vias suas³ et locum habet cogitandi, quam multiplex sit suus defectus, quam modicus profectus, et ex hoc surgit compunctio. Unde dicit propheta David⁴: *Obmutui et humiliatus sum et siliui a bonis, et dolor meus renovatus est.* — Alia utilitas silentii est, quod *hominem demonstrat caelestem esse*. Argumentum quasi infallibile est: si sit homo in Theutonia et non loquatur Theutonice; videtur, quod non sit Theutonicus; sic qui est in mundo et mundana non loquitur evidenter demonstrat, se non esse de mundo. *Qui enim de terra est de terra loquitur*, dicitur in Evangelio Ioannis⁵. — Nihil autem tantum religioso homini

valet ad conservandum silentium, nisi ut fugiat consortia hominum et ducat vitam solitariam. Ille enim homo, qui iam *levavit se supra* statum hominum, non debet habere consolatorem et collocutorem nisi solum Deum; et ideo debet esse *solitarius et tacere*; ex quo enim Deum habet pro socio, non debet curare de humano consortio. Propterea dicitur Threnorum tertio⁶: *Sedebit solitarius et tacebit, quia levavit se supra se. Sedebit, inquam, solitarius*, consortia hominum fugiendo, *et tacebit*, de caelestibus meditando, et *levavit se supra se*, caelestem dulcedinem degustando.

Praecipu-
lentium c.
mendatur.
cris virg-
bus.

4. Etsi omnibus religiosis necessarium sit silentium ad perfectionem virtutum, maxime tamen virginibus Deo dicatis et famulabus lesu Christi⁷ est necessarium, ut disciplinam servant silentii. Ita enim sermo earum deberet esse *pretiosus*, ita deberent esse verecundae in labiis, ut nunquam nisi in magna necessitate loquerentur. Ideo beatus Hieronymus⁸ dicit: « Sit sermo virginis modestus et rarus nec tam eloquentia pretiosus quam pudore ». Hoc etiam consulit philosophus⁹ dicens: « Ad summam perfectionem volo te esse breviloquum, rariloquum et submissa voce loquentem ». — Audi, verbosa famula, audi, virgo clamorosa et garrula: certe, ut possis consuescere tenere silentium, deberes facere, sicut fecit Agathon abbas, de quo legitur in Vitis Patrum¹⁰, « quod lapidem in ore suo per triennium mittebat, donec taciturnitatem disceret ». Alliga et tu lapidem ad linguam, affige linguam tuam ad palatum, *pone digitum super os tuum*¹¹, ut possis taciturnitatem addiscere; quia magnum dedecus sponsae Christi est, ut cum alio quam cum sponso suo lesu Christo velit sermonem habere.

Notando

Exemplum

5. Loquere ergo raro et pauca et breviter, lo-
quere cum timore et pudore, immo *in tua causa*

Exhorta

¹ Iac. 1, 26. — Superius Vat., refragantibus B C D F, pro tanta mala substituit *cuncta mala*, et pro *Certe audeo dicere*: *Frustra ille ponit Certe frustra audeo dicere, quod ille.*

² Luc. 1, 34: Dixit autem Maria ad Angelum: Quomodo fiet istud etc.; ibid. v. 38: Dixit autem Maria: Ecce, ancilla Domini etc.; ibid. v. 40: Et salutavit Elisabeth etc.; ibid. v. 46: Et ait Maria: Magnificat etc. ibid. c. 2, 48: Et dixit mater eius ad illum: Fili, quid fecisti nobis sic? Ioan. 2, 3: Dicit mater lesu ad eum: Vinum non habent; ibid. v. 5: Dicit mater eius ministris: Quodcumque dixerit vobis, facite. Cfr. Bernard., Serm. in Dominica infra octavam Assumptionis B. M. Virg. n. 40. — Superius post *O lesu Christi sponsae fide* B C D F addidimus *amabiles, intuemini dominam vestram atque meam*. Subinde pro *Quantae taciturnitatis* (ita B C D F) Vat. *Quantae moturnitatis*.

³ Psalm. 44, 59: Cogitavi vias meas. — Inferius ex B C D F supplevimus *quam modicus profectus*. ⁴ Psalm. 38, 3.

⁵ Cap. 3, 31. Bernard., Epist. 78. n. 4: Iuge quippe silentium et ab omni strepitu saecularium perpetua quies cogit caelestia meditari. — Superius post *et non loquatur* B C prosequuntur *Theutonicum; non videtur, quod sit Theutonicus*.

⁶ Vers. 28. Cfr. infra pag. 419, nota 2. — Superius pro *in religioso homine valet* fide C D F substituvimus *religioso homini valet*, et pro *consolatorem et collocutorem* (ita C D F) Vat. *consolationem et consolatorem*.

⁷ Ita B C D F, Vat. *virginibus dedicatis lesu Christo*. Inferius pro *verecundae in labiis* C *verecundae in verbis*. — Subinde respicitur I. Reg. 3, 1: Sermo Domini erat pretiosus.

⁸ Epist. 1. in Appendice (cfr. supra pag. 112, nota 2.), c. 19: Sit autem sermo virginis prudens, modestus etc. Pro *modestus* (ita B C) Vat. *modicus*.

⁹ Senec., Epist. 40. in fine: Haec [verba] autem, etiam si aderunt et poterunt sine ullo tuo labore decurrere, tamen temperanda sunt; nam quemadmodum sapienti viro incessus modestior convenit, ita oratio pressa, non audax. Summa ergo summarum haec erit, tardiloquum te esse iubeo. Cfr. tom. VI. pag. 43, nota 2. Codd. A E legunt *Philosophus VIII. Ethicorum*; in hoc libro Aristoteles, agens de amicitia, hanc sententiam non habet. Pro *Ad summam perfectionem* C D F *Ad perfectionis summam*. Vat., refragantibus B C D F, omittit *rariloquum et loquentem*.

¹⁰ Libr. V. libello 4. n. 7. (ed. Migne, Patrol. Lat. tom. 73, col. 865). Pro *disceret* (ita B C F cum textu originali) Vat. *ad-disceret*. — Superius pro *ut possis consuescere tenere silentium, deberes facere* (ita C F) B *ut possis consuescere, certe silentium deberes habere et facere*, Vat. *ut possis assuescere silentio, debes facere*.

¹¹ Iudic. 18, 19.

vix loquere¹. Tege faciem tuam velo verecundiae, consue labia filo disciplinae, et sermo tuus sit brevis, pretiosus et utilis, sit modestus et humilis. Loquere, famula Dei, raro et parum, quia *in multiloquio non deerit peccatum*². Non loquaris verbum otiosum, quia *de omni verbo otioso, quod locuti*

fuertint homines, reddent rationem in die iudicii. « *Verbum otiosum est, ut dicit Glossa, quod sine necessitate dicitur proferentis, aut utilitate audientis* ». Semper igitur melius est et utilius tacere quam loqui, « quia, dicit sapiens³, locutum me esse, aliquando poenituit, tacuisse vero, nunquam ».

CAPITULUM V.

De studio orationis.

1. Supra modum sponsae Christi cupienti proficere necesse est, ut assiduus orationum studiis et devotionibus animum summ exerceat, quia revera religiosus indevotus et tepidus⁴, orationem non frequentans assidue, non solum est miser et inutilis, quinimmo coram Deo mortuam fert animam in vivo corpore. Cum enim tantae efficaciae sit devotionis virtus, ut ipsa sola maligni hostis devincat tentamenta et versutias, qui solus famulam Dei impedit, ne sursum ad caelum ascendat; non est mirum, quod tentationibus frequenter miserabiliter succumbat qui studium orationis assidue non frequentat. Unde beatus Isidorus⁵ dicit: « Hoc est remedium eius qui vitiorum tentamentis aestuat: quoties quolibet vitio tangitur, toties se ad orationem subdat, quia frequens oratio vitiorum impugnationem exstinguit ». Et hoc est quod Dominus in Evangelio⁶ dicit: *Vigilate et orate, ne intretis in tentationem*. — Est autem tantae virtutis devota oratio, ut ad omnia valeat et in omni tempore homo possit per eam lucrari: in hieme et aestate, in sereno et pluviali tempore, de nocte et de die, festivis diebus et ferialibus, in infirmitate et sanitate, in iuventute et senectute, stando, sedendo et eundo, in choro et extra chorum; immo quandoque una hora lucratur plus orando, quam valeat totus mundus, quia modica oratione devota acquirit homo regnum caelorum. Ut autem cognoscas,

quomodo et qualiter orare debeas, quantum mihi Dominus donaverit, te informabo, licet ego in hoc negotio⁷ magis indigeam informari quam tu.

2. Scias itaque, Deo digna famula, quod ad perfectam orationem tria tibi sunt necessaria. Primum est, quando in oratione constituta fueris, tunc, erecto corpore et erecto corde, omnibus clausis sensibus, debes sine strepitu ex amaro⁸ et contrito corde de omnibus miseriis tuis cogitare, scilicet praesentibus, praeteritis et futuris. — Primo siquidem debes sollicite cogitare, quam magna et quam multa peccata omnibus diebus vitae tuae commisisti, quam multa et quam magna bona in saeculo et in Ordine omisisti, quam multam et quam magnam Creatoris tui gratiam frequenter amisisti⁹. — Debes etiam cogitare, quam longe facta es a Deo per peccatum, quae aliquando fueras prope; quam dissimilis facta es Deo, quae aliquando fueras valde similis¹⁰; quam pulchra aliquando eras in anima, quae modo valde turpis es et foeda. — Debes cogitare, quo tendas per peccatum, quia *ad portas inferni*; quid tibi occurret, quia tremendus *dies iudicii*; quid pro his omnibus tibi dabitur, quia *aeternae mortis incendium*. — Et statim pro his omnibus debes cum publicano pectus tuum percutere¹¹, cum propheta David debes *rugire a gemitu cordis tui*, et cum Maria Magdalena debes *lacrymis rigare pedes Domini*

Tria requiruntur ad perfectam orationem. Quoad primum ponitur triplex deploratio.

Quoad praeterita tria deploranda.

Item, quoad praesentia.

Item, quoad futura.

Hortatio.

¹ Eccli. 32, 40.

² Prov. 10, 19. — Sequitur Matth. 12, 36, ubi Glossa *intertinearis* (ex Hieron.) apud Lyranum: *Verbum otiosum*, quod sine utilitate loquentis dicitur et audientis. Cfr. etiam Glossa *ordinaria* (ex Gregor., VII. Moral. c. 47. n. 58. et I. Homil. in Evang. homil. 6. n. 6.) apud Strabum: Otiosum verbum est, quod aut utilitate rectitudinis aut ratione iustae necessitatis caret.

³ Xenocrates, ut refert Valerius Maximus, VII. Dictorum factorumque memorabilium, c. 2. ab externis n. 6. S. Arsenius, ut ex Simeone Metaphraste Surius in ipsius vita (29 Iulii) § 34. refert, canere solebat: Me saepe poenituit dixisse, nunquam autem tacuisse. Cfr. Ambros., I. de Officiis, c. 2. n. 5: Quamplures vidi loquendo peccatum incidisse, vix quemquam tacendo.

⁴ Ex B C D F supplevimus *religiosus indevotus et tepidus*. Inferius B C F omittunt *efficaciae*, ubi in F pro *tantae* secunda manus substituit *tanta*.

⁵ Libr. III. Sentent. c. 7. n. 4. Textus originalis voci *quoties* praefigit *ut*.

⁶ Matth. 26, 41; Marc. 14, 38; Luc. 22, 40. et 46. —

Inferius post *pluviali tempore*, refragantibus B C D F, Vat. prosequitur *immo in quacumque hora lucratur homo oratione devota plus, quam valeat totus mundus, quia tali oratione acquirit homo regnum caelorum*.

⁷ Vat., contradicentibus B C D F, in hac parte et in hoc negotio.

⁸ Vat. cum nonnullis codd. *ex amore*.

⁹ Cfr. supra Opusculum I. de Triplici Via, c. 2. n. 2, ubi etiam seqq. tanguntur. — Superius post *magna bona* B C D F addunt *tua*.

¹⁰ Respiciuntur verba ex Bernardi operibus supra pag. 30, nota 4. allegata. — Inferius pro *foetida fide* C et textus citati opusculi substituiimus *foeda*.

¹¹ Luc. 18, 43: Percutiebatur pectus suum dicens: Deus, propitius esto mihi peccatori. — Duo seqq. loci sunt Ps. 37, 9: *Rugiebam a gemitu cordis mei*, et Luc. 7, 38: *Lacrymis coepit rigare pedes eius*. — Inferius post *quia sine modo* B C F prosequuntur *tuum Sponsum, sine modo tuum Dominum, sine modo tuum dilectum Iesum offendisti*.

Iesu; nec debes aliquem modum habere in lacrymis, quia sine modo tuum dilectum Iesum offendisti. Et hoc est quod ait beatus Isidorus¹: « Cum Deo in oratione assistimus, gemere et flere debemus, reminiscentes, quam gravia sunt quae commisimus, quam dura inferni supplicia, quae timemus ». Et huiusmodi lacrymosae meditationes debent tuae orationis esse principium.

Quoad secundum requiritur gratiarum actio.

3. Secundum, quod sponsae Dei in oratione est necessarium, est *gratiarum actio*, ut videlicet suo Creatori cum omni humilitate grates referat pro beneficiis ab eo iam receptis et adhuc recipiendis. Et hoc consuluit Paulus Apostolus ad Colossenses quarto², dicens: *Orationi instantes, vigilantes in ea in gratiarum actione*. Nihil enim est, quod hominem ita dignum reddit divinis muneribus, sicut semper Deo gratias reddere et agere pro receptis donis. Unde beatus Augustinus scribens ad Aurelium³ dicit: « Quid melius animo geramus et ore promamus et calamo exprimamus quam *Deo gratias*? Hoc nec dici brevius nec andiri laetius nec intelligi grandius nec agi fructuosius potest ». — Debes ergo in oratione posita cum gratiarum actione meditari, quia Deus hominem te fecit, quia Christianam te fecit, quia innumerabilia peccata tibi indulsit; quia in multa peccata incidisses, si Dominus te non custodivisset⁴; quia in saeculo te mori non permisit, quia ad altissimam et perfectissimam religionem te elegit et quia sine labore tuo te pavit et pascit; quia pro te homo factus est, circumcisis et baptizatus est; quia pro te pauper et nudus, humilis et despectus factus est, quia propter te ieiunavit, esurivit, sitivit, laboravit et fatigatus est; quia propter te ploravit, sudorem sanguineum sudavit, te sanctissimo corpore suo cibavit, pretiosissimo sanguine suo potavit; quia propter te colaphizatus est, consputus et derisus est, flagellatus est; quia propter te crucifixus est, vulneratus est, morte turpissima et amarissima occisus

Memoratio beneficiorum Dei plurimorum.

est et sic te redemit⁵; quia sepultus, resurrexit, ad caelos ascendit, Spiritum sanctum dedit et quia tibi et omnibus suis electis regnum caelorum dare promisit. — Talis gratiarum actio supra modum utilis est in oratione, nec sine ea aliqua potest valere oratio. Nam « ingratitude, ut dicit beatus Bernardus⁶, est ventus urens, exsiccans fontem pietatis, rorem misericordiae et fluentia gratiae ».

Nolande

4. Tertium, quod ad perfectionem orationis necessario requiritur, est, ut animus tuus *nihil aliud in oratione cogitet* praeter id solum, quod precaris⁷. Valde enim indecens est, ut quis cum Deo loquatur ore et aliud meditetur corde, ut dimidium cor dirigatur in caelum, et dimidium retineatur in terra; et talis oratio nunquam exauditur a Domino. Unde super illo verbo Psalmi⁸: *Clamavi in toto corde meo; exaudi me, Domine*; dicit Glossa: « Divisum cor non impetrat ». Debet enim famula Dei tempore orationis cor suum ab omnibus exterioribus curis, ab omnibus mundanis desideriis, ab omnibus carnalibus amoribus revocare ad interiora et illi soli in toto corde et tota mente intendere, ad quem suam orationem dirigit. Et hoc consuluit tibi Sponsus tuus Iesus in Evangelio⁹, dicens: *Tu autem, cum oraveris, intra in cubiculum tuum, et clauso ostio, ora Patrem tuum*. Tunc *cubiculum es ingressa*, quando omnes cogitationes, omnia desideria, omnes affectiones tuas in secretum cordis tui revocasti; tunc *clausisti ostium tuum*, quando sic diligenter cor tuum custodis, ut per nullas cogitationes tuas phantasticas possis in devotione impediri. « Oratio enim, ut dicit Augustinus¹⁰, est conversio mentis in Deum, per pium et humilem affectum ».

Quoad tertium requiritur perfectio actus interioris.

5. *Audi*, o beatissima mater, audi, o famula Iesu Christi, *et inclina aurem tuam ad verba oris mei*¹¹. Noli falli, noli decipi, non amittas magnum tuae orationis fructum, non perdas suavitatem, non frusteris dulcedine, quam in oratione baurire debes.

Exhortatio

¹ Libr. III. Sentent. c. 7. n. 5, ubi textus originalis *sint* pro *sunt* et *dura* pro *dura*. — Inferius post *Et huiusmodi* Vat. cum nonnullis codd. legit *lacrymosae cogitationes meditationis debent esse principium*.

² Vers. 2: *Orationi instale* etc. — Superius ex BC supplevimus *et adhuc recipiendis*; pro *consuluit* DEF *consulit*.

³ Epist. 41. (alias 77.) n. 1.

⁴ Cfr. supra pag. 6, nota 4. et pag. 41, nota 7. in fine. — Inferius loco *pro te pauper* BCF *propter te pauper*.

⁵ Vat. cum nonnullis codd. *derisus et flagellatus est, vulneratus et crucifixus est, mortem turpissimam et amarissimam sustinuit*.

⁶ Serm. 51. in Cant. n. 6; cfr. supra pag. 40, nota 6. — Superius pro *Talis gratiarum actio* (ita BC) Vat. *Est enim gratiarum actio*, omisso subinde post *utilis* verbo *est*.

⁷ Ita BCD, Vat. *precatur*, quae etiam subinde pro *dirigatur et retineatur* (ita BCF) substituit *dirigat et maneat*.

⁸ Psalm. 418, 145. — Glossa in hunc locum est *interlinearis* apud Lyranum: *Mens divisa non impetrat*. Cfr. August., Enarrat. in Ps. 118. Serm. 29. n. 4: *Est autem clamor cordis magna cogitationis intentio, quae cum est in oratione, magnum*

exprimit desiderantis et petentis affectum, ut non desperet effectum. Tunc porro *in toto corde clamatur*, quando aliunde non cogitatur. Tales orationes rarae sunt multis, crebrae autem paucis, omnes vero utrum cuiquam nescio etc. In Glossa post *impetrat* Vat. contra BCD F et textum originalem addit *quod petit*.

⁹ Math. 6, 6, quem locum August., II. de Serm. Domioi in monte, c. 3. n. 11, ita exponit: *Quae sunt ista cubacula nisi ipsa corda, quae in Psalmo [4, 5.] etiam significantur, cum dicitur: Quae dicitis in cordibus vestris et in cubilibus vestris compungimini?... Parum est intrare in cubacula, si ostium pateat importunis, per quod ostium ea quae foris sunt, improbe se immergunt et interiora nostra appetunt... Claudendum est ergo ostium, id est carnali sensui resistendum est, ut oratio spiritualis dirigatur ad Patrem, quae fit in intimis cordis, ubi oratur Pater in abscondito*. — Superius pro *consuluit* DEF *consulit*. Inferius pro *in secretum* (ita BC) Vat. *in secreto*.

¹⁰ Libr. de Spiritu et anima (inter opera August.), c. 50.

¹¹ Psalm. 44, 14, ubi tamen omittitur *ad verba oris mei*, de quo cfr. Ps. 77, 4: *Inclinate aurem vestram in verba oris mei*.

Oratio enim hausorium est, quo Spiritus sancti gratia hauritur de fonte supereffluentis dulcedinis illius beatissimae Trinitatis. Et hoc expertus erat ille devotissimus propheta David, qui dicebat¹: *Os meum aperui et attraxi spiritum. Os meum aperui*, dicit Glossa: «Orando, quaerendo, pulsando», *et attraxi spiritum*, dicit Glossa: «Id est hausi». — Nunquid iam non dixi tibi, quid sit oratio? Audi iterum: «Oratio est conversio mentis in Deum». Vis scire, quomodo mentem tuam in Deum debeas convertere? Intende. Cum stas in oratione, totam debes temetipsam colligere et cum dilecto tuo in cubiculum cordis tui ingredi et sola cum solo morari, omnium exteriorum oblivisci et toto corde, tota mente, toto affectu, toto desiderio, tota devotione debes te levare supra te². Nec debes ab oratione spiritum relaxare, sed tamdiu per devotionis ardorem sursum ascendere, donec ingrediaris in locum tabernaculi admirabilis usque ad domum Dei³, et ibi utrumque cordis oculo dilecto tuo viso et utrumque degustato, quam suavis est Dominus, et quam magna multitudo dulcedinis eius, in amplexu eius ruas, impressis labiis intimae devotionis oscula figas, ut sic tota a te alienata, tota in caelum rapta, tota in Christum transformata, non valeas cohibere spiritum tuum, sed exclames cum propheta David⁴ et dicas: *Renuit consolari anima mea; memor fui Dei et delectatus sum*.

6. Ut autem cor tuum, mater carissima, per devotionem orationis sublimius eleveatur et ferventius ad Deum⁵ inflammetur, nota diligenter, quod tribus de causis in mentis alienationem deducimur: aliquando prae magnitudine devotionis, aliquando prae

magnitudine admirationis, aliquando prae magnitudine exultationis.

7. Dico, quod aliquando fit prae magnitudine devotionis, «ut mens semetipsam non capiat et supra semetipsam elevata in alienationem transeat⁶», «quando tanto caelestis desiderii igne succendimur, ut omne, quod foris est, vertatur in amaritudinem et fastidium, et amoris intimi flamma ultra humanum modum excrescat, quae animam ad ceræ similitudinem liquefactam in se ipsa deficere faciat, ad instar fumi aromatum in superna eleveatur et ad summa emittat». Et tunc cogimur exclamare cum Propheta⁷ et dicere: *Defecit caro mea et cor meum, Deus cordis mei, et pars mea Deus in aeternum*.

8. Item, aliquando fit prae magnitudine admirationis, «quando divino lumine mens irradiata et summae pulcritudinis admiratione suspensa, tam vehementi stupore concutitur, ut a suo statu funditus excutiat et in modum fulguris coruscantis, quanto profundius per despectum sui invisae pulcritudinis respectu in ima deicitur, tanto sublimius tantoque celerius per summorum desideriorum ardorem relevata et super semetipsam rapta, in sublimia elevatur⁸». Et tunc cogitur exclamare cum illa sanctissima Esther: *Vidi te, domine, quasi Angelum Dei, et conturbatum est cor meum prae timore gloriæ tuæ. Valde enim mirabilis es, domine, et facies tuæ plena est gratiarum*.

9. Item, aliquando fit prae multitudine exultationis, «quando intima illa internae suavitatis abundantia potata, immo plene inebriata, quid sit, quid fuerit, penitus obliviscitur et in supermundanum quendam affectum sub quodam mirae felicitatis

De causa prima.

De secunda.

De tertia.

¹ Psalm. 118, 131. — Glossa in hunc locum est ordinaria ex August., Enarrat. in Ps. 118. serm. 27. n. 4: *Aperuit os petendo, quaerendo, pulsando, et sitiens hausit spiritum bonum, unde faceret quod per se ipsum non poterat etc.* Cfr. Petr. Lombard. in hunc locum. Mutillam lectionem Vat. *Os meum aperui dicit, et hausi* correximus ex BCF.

² Respicitur Thren. 3, 28: *Sedebit solitarius et tacebit, quia levavit super se; cfr. supra c. 4. n. 3. in fine.* — Superius pro *totam debes temetipsam colligere* (ita B, cui consentiunt CF, qui tamen voci *debes* praefigunt *tu*) Vat. *tu totam debes in te ipsam convertere et colligere*, quae etiam pro *toto corde* (ita DF) substituit *toto corpore*.

³ Psalm. 41, 5. — Duo seqq. loci sunt Ps. 33, 9. et 30, 20. — Pro *utrumque cordis oculo* (ita BCD) Vat. *utroque cordis oculo*, et pro *utrumque degustato* BCF *utrumque degustando*.

⁴ Psalm. 76, 3. et 4. Pro *delectatus sum* BF *delectata sum*. — Superius voci *transformata* Vat. contra BCD F praefigit *reformatam et*.

⁵ Ita BCF, Vat. *per devotionis orationem in sublimia eleveatur et ferventius in Deum*. Subinde pro *deducimur* BF *adducimur*, C *abducimur*, et pro *prae magnitudine*, quod fide BCD F ter posuimus, Vat. *per magnitudinem* (idem occurrit in n. 7. et 8.). Pro nostra lectione est etiam Richard. a S. Vict., V. Benjamin maior, c. 5, cuius doctrina in seqq. proponitur:

Tribus autem de causis, ut mihi videtur, in mentis alienationem adducimur. Nam modo prae magnitudine devotionis, modo prae magnitudine admirationis, modo vero prae magnitudine exultationis fit, ut semetipsam mens omnino non capiat et supra semetipsam elevata in abalienationem transeat.

⁶ Richard. a S. Vict. in fine notae praecedentis allegatus. Loc. cit. affert Richard. etiam ea quae sequuntur. Textus originalis substituit *succenditur* pro *succendimur* (ita BC, F *succendimur*), omittit *omne quod... et fastidium, et ac pro in se ipsa deficere faciat, ad instar fumi aromatum* (cfr. Apoc. 8, 4, iuxta versionem in Expos. in Apoc., quae est inter opera Ambros.) ponit a *pristino statu penitus resolvat, et ad instar fumi attenuatam* (F *odthymiatam*?). Pro *quando tanto caelestis desiderii igne succendimur* Vat. *quando tota igne caelestis desiderii succenditur*, quae etiam in fine (contra BCF et textum originalem) legit *ad summam putriam emittat*.

⁷ Psalm. 72, 26. — Vat. cum nonnullis codd. *Et tunc cum Propheta exclama et dic*.

⁸ Richard. a S. Vict., loc. cit. Respicitur Ezech. 1, 14: *In similitudinem fulguris coruscantis. Pro per summorum desideriorum ardorem relevata* (BC *reversata*) textus originalis *per summorum desiderium reverberata*. Pro *per despectum sui invisae pulcritudinis* Vat. cum nonnullis codd. *pro despectu sui visae pulcritudinis et in sublimia eleveatur* pro *in sublimia elevatur*. — Sequitur Esther 15, 16. seq.

statu rapta transformatur¹. Et tunc cogitur exclamare et dicere illud Prophetæ: *Quam dilecta tabernacula tua, Domine virtutum! concupiscit et defecit anima mea in atria Domini. Cor meum et caro mea exsultaverunt in Deum vivum.*

10. Sic ergo debet famula Dei exercere animum summ in studium orationis devotæ et discere per frequentem orationis usum², per mundati et purificati cordis oculum, per infatigabilem devotionis spiritum, qualiter efficiatur idonea ad contemplanda divina et degustanda divinae dulcedinis suavitate. Non enim decet animam insignitam Dei imagine, decoratam Dei similitudine, redemptam Dei sanguine, capacem beatitudinis³ volitare circa ista temporalia, sed *ascendere debet super Cherubim et volare super pennas*

ventorum, id est ordines Angelorum, ad contemplandam ipsam Trinitatem et Christi humanitatem, et meditari gloriam et lætitiā supernorum civium, scilicet Angelorum et Sanctorum omnium. — Sed qui sunt hodie, qui huiusmodi meditationibus vacent, qui sint exploratores gaudii caelestis, qui corde et animo conversentur in caelis⁴? Rari sunt. Unde bene potest dici de quibusdam religiosis illud verbum, quod beatus Bernardus⁵ dicit: « Quorum studium deberet esse devotione caelos penetrare, mente circuire supernas mansiones, salutare Apostolos et choros Prophetarum Martyrumque admirari triumphos, omnibus his postpositis, turpi se manciant corporis servituti ad obediendum carni, ad satisfaciendum gulæ et ventri ».

Deplo-
neglige-
religiosi
in orati-
faciend

CAPITULUM VI.

De passionis Christi memoria.

1. Quoniam devotionis fervor per frequentem Christi passionis memoriam nutritur et conservatur in homine, ideo necesse est, ut frequenter, ut semper⁶ oculis cordis sui Christum in cruce tanquam morientem videat qui devotionem in se vult inextinguibilem conservare. Propter hoc Dominus dicit in Levitico⁷: *Ignis in altari meo semper ardebit, quem nutriet sacerdos subiiciens ligna per singulos dies.* Audi, mater devotissima: *Altare Dei* est cor tuum; in hoc altari debet semper ardere *ignis* fervidae devotionis, quem singulis diebus debes *nutrire* per *ligna* crucis Christi et memoriam passionis ipsius. Et hoc est quod dicit Isaias propheta⁸: *Haurietis aquas in gaudio de fontibus Salvatoris*; ac si diceret: quicumque desiderat a Deo aquas gratiarum, aquas devotionis, aquas lacrymarum, ille hauriat de fontibus Salvatoris, id est de quinque vulneribus Iesu Christi.

2. Accede ergo tu, o famula, pedibus affectionum tuarum ad Iesum vulneratum, ad Iesum spinis coronatum, ad Iesum patibulo crucis affixum, et cum

beato Thoma Apostolo non solum intueri in *manibus eius fixuram clavorum*, non solum mitte *digitum tuum in locum clavorum*, non solum mitte *manum tuam in latus eius*⁹, sed totaliter per ostium lateris ingredi usque ad cor ipsius Iesu, ibique ardentissimo Crucifixi amore in Christum transformata, clavis divini timoris confixa, lancea prae cordialis dilectionis transfixa, gladio intimae compassionis transverberata, nihil aliud quaeras, nihil aliud desideres, in nullo alio velis consolari, quam ut cum Christo tu possis in cruce mori. Et tunc cum Paulo Apostolo¹⁰ exclames et dicas: *Christo confixus sum cruci. Vivo iam non ego, vivit vero in me Christus.*

Notand

3. Debes autem per hunc modum passionem Christi in memoria habere, ut cogites, quoniam¹¹ passio eius fuit *ignominiosissima, acerbissima, generalissima et diuturnissima*. — Primo considera, Deo digna famula, quam mors Iesu Christi sponsi tui fuit *ignominiosissima*. Fuit enim *crucifixus* tanquam fur et latro. Nulli enim in lege veteri¹² tali

Medita
quatuor
ditiones
sionis
sti.

De pri

¹ Richard. a S. Viet., loc. cit. Textus originalis post obli-
viscitur addit et in abalienationis excessum tripudii sui ni-
mietate traducitur et pro rapta [F raptu, BCD raptum]
transformatur substituit raptim transformatur. — Subinde
allegatur Ps. 83, 2. seq.

² Ita BCF, Vat. *animum suum ex devota in Deum ora-
tione et ducere per frequentem ordinis versum*, quae etiam
inferius pro *qualiter efficiatur* (ita BCD F) substituit *quatenus
efficiatur*.

³ Respiciuntur verba Bernardi supra pag. 30, nota 8. et
pag. 36, nota 3. allata. — Sequitur Ps. 17, 41. — Pro *volitare*
(ita DF) Vat. *volutari*.

⁴ Phil. 3, 20: Nostra autem conversatio in caelis est.

⁵ Serm. 35. in Cant. n. 3. Textus originalis hinc inde plura
interserit.

⁶ Ita BCF, Vat. *ideo est dicendum consequenter, ut semper*.

⁷ Cap. 6, 12. Vulgata omittit *meo*. Gregor., XXV. Moral.

c. 7. n. 15, hunc locum explicans dicit: *Altare* quippe Dei est
cor nostrum, in quo iubetur *ignis semper ardere*, quia necesse
est, ex illo ad Dominum caritatis flammam indesinenter ascen-
dere. Cui *per singulos dies sacerdos ligna subiiciat*, ne exsting-
guatur etc.

⁸ Cap. 12, 3. — Inferius ex BCDEF supplevimus *aquas
devotionis*.

⁹ Ioan. 20, 25. et 27. Vat., refragantibus BCDF, omittit
non solum mitte digitum tuum in locum clavorum. — Infe-
rius pro *clavis divini amoris confixa* [D *infixa*, Vat. *affixa*]
ex BCF substituit *clavis divini timoris confixa*; Vat. sub-
inde contra BCDF omittit *gladio*.

¹⁰ Gal. 2, 19. et 20. Pro *confixus sum* BC *confixa sum*.

¹¹ Cod. B *quomodo*.

¹² Cfr. Num. 25, 4; Deut. 21, 22. seq. (Gal. 3, 13.); II.
Reg. 21, 1-9; Esther 7, 10. et 9, 13. seq. — Supcrius pro
Fuit enim crucifixus BC *Fuit enim cruci affixus*.

morte puniebantur nisi pessimi et sceleratissimi et fures et latrones. — Adhuc attende Christi maiorem ignominiam. Fuit enim in loco turpissimo et vilissimo crucifixus, scilicet in monte Calvariae¹, ubi multa ossa et cadavera mortuorum iacebant. Ille siquidem locus erat morti damnatorum deputatus, et ibi decollabantur et suspendebantur non alii nisi pessimi homines. — Adhuc vide Christi maiorem ignominiam, quia inter latrones *tanquam latro* suspenditur et in medio *tanquam princeps latronum*. Unde Isaias² dicit: *Cum sceleratis reputatus est*. — Adhuc intueere Sponsi tui maiorem ignominiam, quia *aëri deputatus est* et inter caelum et terram suspensus, ac si non esset dignus vivere aut mori in terra. O digna indignatio et iniuria! Domino orbis terrarum totus negatus est orbis, vilius in mundo nihil aestimatum est Domino mundi. Sic ergo fuit mors Filii Dei ignominiosissima propter *genus* mortis, quia in patibulo suspensus; propter *socios* mortis, quia *cum iniquis deputatus*³ et condemnatus; propter *locum* mortis, quia in monte Calvariae foetidissimo crucifixus.

4. O bone Iesu, o benigne Salvator, quia non semel, sed multoties⁴ confunderis! Quanto quis pluribus locis confunditur, tanto ignominiosior efficitur mundo; et ecce, tu Domine Iesu, in horto ligaris, in domo Annae alapa caederis, in atrio Caiphae conspuearis, in hospitio Herodis illuderis, in via crucem baiulas, in Golgotha crucifigeris. Heu me, heu me, ecce, libertas captivorum capitur, gloria Angelorum illuditur, vita hominum occiditur! O Iudaei miseri, bene implevistis quod promisistis! Dixistis enim⁵:

Morte turpissima condemnemus eum. Propterea beatus Bernardus⁶ dicit: « *Exinanivit semetipsum, formam servi accipiens*; Filius erat et factus est servus, nec formam servi solum accepit, ut subesset, sed etiam mali servi, ut vapularet, ut poenam solveret, cum culpam non haberet »; et erat non solum *servus servorum Dei*, ut Papa⁷, sed etiam *servus servorum diaboli* factus, serviens infima peccata peccatorum expurgando. Nec hoc sibi sufficit, sed mortem omni morte confusibiliorem elegit, ne et tu pati similia formidares. *Humiliavit enim semetipsum, factus obediens usque ad mortem, mortem autem crucis*⁸, « quae est ignominiosior », ut dicit Glossa.

5. Secundo considera et attende, virgo Deo devota, quoniam passio Christi⁹ fuit *acerbissima*. Crux enim illa beata membra in se extensa contrahi in dolore mortis non permisit, quod tamen solet esse quoddam levamen et solatium cordibus anxietis, nec habuit illud reverendum divinum caput, ubi ad dimissionem animae se inclinaret. — Attende adhuc melius, quam acerba mors Christi fuerit. Quanto quid tenerius¹⁰, tanto patitur gravius; nunquam autem fuit corpus ita tenerum ad sustinendum passiones, sicut corpus Salvatoris. Corpus enim mulieris tenerius est quam corpus viri; caro autem Christi tota virginea fuit, quia de Spiritu sancto concepta et de Virgine nata: igitur passio Christi fuit omnium passionum acerbior, quia omnium virginum tenerior¹¹. Si enim ad solam mortis recordationem sic *tristis facta est anima* sua prae teneritudine carnis, ut *sudor corporis sui fieret sicut sudor sanguinis decurrentis in terram*¹²; quantus superadditus

¹ Matth. 27, 33; Marc. 15, 22; Luc. 23, 33; Ioan. 19, 17. Cfr. Bonav., Comment. in Sap. 2, 49. seq.; Comment. in Ioan. 19, 17. n. 29; Comment. in Luc. 23, 33. n. 39.

² Cap. 53, 42. Cfr. Matth. 27, 38; Marc. 15, 27. seq.; Luc. 22, 37. et 23, 33; Ioan. 19, 18. Pro *reputatus* D *deputatus* (vide paulo inferius).

³ Luc. 22, 37. — Codd. D F *cum iniquis damnatus*, omisso deinde *et condemnatus*, quod etiam B C omittunt. Pro in monte B C F in loco.

⁴ Codd. B C addunt *pro me*.

⁵ Sap. 2, 20. — Superius auctoritate B C F supplevimus *capitur et illuditur*.

⁶ Serm. in Feria 4. Hebdomadae sanctae, n. 40. In principio allegatur Phil. 2, 7. Textus originalis voci *servus* praefigit *tanquam*, et post *ut vapularet* addit *et servi peccati*.

⁷ Gregor. Magnus, ut notat Ioan. Diaconus, II. S. Gregorii Magni vita, n. 1, « primus omnium se in principio epistolarum suarum *servum servorum Dei* scribi satis humiliter definivit cunctisque suis successoribus documentum suae humilitatis... quod videlicet haec in sancta Romana Ecclesia conservatur, hereditarium reliquit ». — Ex B C F supplevimus *ut Papa*. Subinde pro *sed etiam* (ita F) B C *sed*, D *sed propterea* [praeterea?], Vat. *sed propter tria*.

⁸ Phil. 2, 8. Glossa allegata est apud Lyrannum *interlinearis*: Quia ignominiosior. Cfr. Petr. Lombard., in hunc loc.: « Humiliavit se Christus usque ad incarnationem... usque ad mortem. Et si parum est hoc, aliquid de genere mortis addendum est; mortem autem non quamlibet, sed crucis, quae ignominiosior est ». Ita August., Serm. 304. (serm. 3. in solemnitate

Laurentii mart., alias 37. de Diversis) c. 3. n. 3, excepta propositione *quae ignominiosior est*, quam textus originalis omittit, de qua vide ipsius Libr. contra Adimantum Manichaei discipulum, c. 21: Suscipiendo autem *ignominiosissimum* apud homines mortis genus Dominus noster Iesus Christus, hoc est mortem crucis, commendavit nobis... Ut non solum nullam mortem, sed etiam nullum mortis genus christiana libertas, sicut Iudaica servitus, formidaret. — Superius ex B C D F supplevimus *ne et tu pati similia* [C *talita*] *formidares*.

⁹ Pro *quoniam passio Christi* (ita B C) Vat. *passio Christi quam*, quae etiam subinde pro *beata* (ita B C F) substituit *benedicta*, et pro *solatium cordibus anxietis* (ita B C F) ponit *solatium cordis anxietati*.

¹⁰ Ita B C F, Vat. *Quanto quis tenerior*.

¹¹ Cfr. III. Sent. d. 16: a. 1. q. 2. in corp., ubi S. Doctor ait: Si autem consideretur qualitas sive *conditio patientis*, maxima erat afflictio propter maximam complexionis aequalitatem et propter sensus vivacitatem. Unde quia nullus potuit ei aequari nec in aequalitate complexionis nec in vivacitate sensus, dolor illius omnium dolorum fuit acutissimus. — Superius pro *quia de Spiritu sancto* (ita B C D F) Vat. *et de Spiritu sancto*.

¹² Matth. 26, 38: Tristis est anima mea usque ad mortem. Luc. 22, 44: Et factus est sudor eius sicut guttae etc. — Superius post *mortis recordationem* Vat. contra B C F prosequitur *Christus in sancta anima sua prae teneritudine carnis tantum afflicto est, ut sudor corporis fieret sicut sudor sanguinis decurrentis in terram, quanto superadditus est ei dolor, quanta eum afflicto poena in degustatione acerbissimae mortis et passionis*.

est ei dolor, quanta inflicta poena in degustatione acerbissimae passionis. Ideo beatus Bernardus¹ dicit: «Angustias cordis tui, Domine Iesu Christe, certissime indicabat sudor ille sanguineus, qui orationis tempore de tua sanctissima carne decurrebat in terram». «Quid fecisti, dulcissime puer, ut ita tractareris? Quid commisisti, o amantissime iuvenis, ut ita iudicareris? Ecce, ego sum causa tui doloris, ego plaga tuae occisionis²». — Adhuc vide diligentius, quam amara mors Christi fuerit. Quanto quis innocentior, tanto poena ad tolerandum gravior. Si enim Christus propter sua peccata illum dolorem sustinuisset, aliquantulum esset tolerabilior; sed ipse *peccatum non fecit, sed nec inventus est dolus in ore eius*³. Et hoc ipsum testatur Pilatus, dicens: *Nullam causam mortis invenio in eo*. Ipse enim est *candor lucis aeternae et speculum sine macula Dei maiestatis et imago bonitatis illius*, sicut dicitur Sapientiae septimo.

Ratio 3.

De tertia.

6. Considera adhuc plenius, quam poenalis fuerit mors dilecti Sponsi tui, Iesu Christi. Quanto *generalior*, tanto poena acerbior; Christus autem, Sponsus tuus, passus est in omni parte corporis sui, sic quod nullum ita parvum membrum fuerit in eo, quin specialem poenam haberet; nullus ita modicus locus, quin repletus esset amaritudine. *A planta enim pedis usque ad verticem capitis non fuit in eo sanitas*⁴. Unde prae nimia doloris vehementia clamavit, dicens: *O vos omnes, qui transitis per viam, attendite et videte, si est dolor sicut dolor meus*. Re vera, Domine Iesu Christe, nunquam fuit dolor similis dolori tuo. Tanta enim fuit sanguinis tui effusio, ut totum corpus tuum aspergeretur⁵. — O bone Iesu, o dulcissime Domine! cum non *gutta*, sed sanguinis *unda* ita largiter per quinque partes corporis tui emanaverit de manibus et pedibus in crucifixione, de capite in coronatione, de toto corpore in flagellatione, de ipso corde in lateris apertione; mirum videtur, si quid sanguinis remansit in

Affectus ad Christum.

te. Dic, quaeso, dilecte mi Domine, dic, cum unica tui sacratissimi sanguinis gutta potuisset sufficere ad totius mundi redemptionem, cur tantum sanguinem de corpore tuo effundi permisisti? Scio, Domine, et vere scio, quia propter aliud hoc non fecisti, nisi ut ostenderes, quanto affectu me diligeres.

7. Quid igitur *retribuam Domino pro omnibus, quae retribuit mihi*⁶? «Certe, Domine, quamdiu vixero, memor ero laborum tuorum, quos sustinuisti in praedicando, fatigationum in discurrendo, vigiliarum in orando, lacrymarum in compatiendo, dolorum, convitiarum, sputorum, colaphorum, subannationum, clavorum et vulnerum; alioquin *requiretur a me sanguis iusti, qui effusus est super terram*». *Quis igitur dabit capiti meo aquam et oculis meis fontem lacrymarum*⁷, ut possim flere die ac nocte mortem Domini mei Iesu, quam non pro suis, sed pro meis peccatis sustinuit? *Vulneratus est propter iniquitates nostras, attritus est propter scelera nostra*, sicut dicit Isaías propheta.

Retribue memori passioni.

8. Ultimo considera et attende diligenter, quia mors et passio Christi fuit *diuturnissima*. A prima enim die nativitatis suae usque ad ultimum diem mortis semper fuit in passionibus et doloribus, sicut ipse testatur per Prophetam dicens⁸: *Pauper sum ego et in laboribus a iuventute mea*; et alibi dicit: *Fui flagellatus tota die*, id est toto tempore vitae meae. — Adhuc aliter considera, quam *morosa* passio Christi fuerit. Ad hoc enim suspensus fuit, ut poena magis duraret, ut dolor non cito finiretur, ut mors protraheretur et sic diutius cruciaretur et fortius vexaretur.

De quarta.

Ratio 1.

Ratio 2.

9. Ex his⁹ omnibus, quae iam dixi, colligere potes, o virgo Christi, o famula Dei, quam *probrosa*, quam *dolorosa*, quam *universalis*, quam *morosa* fuerit mors et passio dilectissimi Sponsi tui, Iesu Christi. Et haec omnia sustinuit, ut ad suum amorem te accenderet, ut pro omnibus his toto corde, tota anima, tota mente ipsum diligeres¹⁰. Quid

Corollari.

¹ Serm. de vita et passione Domini (inter opera Bernardi), n. 6. Sermo ille incipit: *Iesum Nazarenum a Iudaeis innocentem condemnatum*, et habetur etiam in operibus Anselmi, nempe Meditat. 9, ex qua supra in Opusculo III. Lignum vitae plura allata sunt, v. g. n. 18. 27. 29. 31. 36. 38. 47. et 48. Textus originalis verbo *decurrebat* [B C F *currebat*] praefigit *guttatim*. Textu originali et B C F repugnantibus, Vat. pro *cordis tui* substituit *corporis tui*; pro *sanguineus* (ita etiam textus originalis) B *sanctissimus*, C F *sanctissimus, sanguineus*.

² Anselm., Orat. 2. Post *tractareris* textus originalis prosequitur: *Quod scelus tuum, quae noxa tua, quae causa mortis, quae occasio tuae damnationis? Ego enim sum tui plaga doloris, tuae culpa occisionis*.

³ Epist. 1. Petr. 2, 22. — Duo seqq. loci sunt Ioan. 18, 38. et Sap. 7, 26. — Superius pro *esset tolerabilior*, quibus vocibus Vat. contra B C D F praefigit *ei*, B C F *esset tolerandus*, D *esset tolerandum*.

⁴ Isai. 1, 6. — Sequitur Thren. 1, 42.

⁵ Ita B C F, Vat. *sanguine aspergeretur*, superius ab ipsa substituto *doloris pro sanguinis*.

⁶ Psalm. 115, 12. (3.). — Sequitur sententia Bernardi, Serm. in Feria 4. Hebdomadae sanctae, n. 11; cfr. Serm. 22. de Diversis, n. 5. et Serm. 43. in Cant. n. 3. In fine respicitur Ezech. 3, 18. 20. et 33, 8; Matth. 23, 35: «*Ut veniat super vos omnis sanguis iustus, qui effusus est super terram*». Pro *sanguis iusti* (ita B C D F, Vat. omittit *iusti*) textus originalis *sanguis iustus*, qui etiam pro *et vulnerum* plura alia substituit. Pro *requiretur* F *requiretur*.

⁷ Ier. 9, 1. — Sequitur Isai. 53, 5.

⁸ Psalm. 87, 16. et deinde Ps. 72, 14. — Superius pro *diuturnissima* (cfr. supra n. 3.) Vat. contra B C F *diutina*, quae etiam inferius omittit *Ad hoc enim suspensus fuit* (ita B C F).

⁹ Codd. B C F *Et ex his*. Inferius pro *universalis* (ita B F) Vat. *vilis*, et *dulcissimi* pro *dilectissimi* (ita B C).

¹⁰ Respicitur Matth. 22, 37: «*Diliges Dominum Deum tuum ex toto corde tuo et in tota anima tua et in tota mente tua*». Et inferius Phil. 2, 7: *Semetipsum exinanivit formam servi accipiens*. — Subinde pro *tolerandi mortem* Vat. *tollendi mortem*.

enim benevolentius, quam quod Dominus propter servi salutem accipiat servi formam? Quid magis informat hominem ad salutem, quam exemplum tolerandi mortem propter iustitiam et obedientiam divinam? Quid vero magis incitat hominem ad diligendum Deum, quam tanta benignitas, qua pro nobis Filius Dei altissimi absque meritis, immo cum multis nostris demeritis, *posuit animam suam*¹? Hoc tantae benignitatis est, ut nihil clementius, nihil benignius, nihil amicabilius cogitari possit. Haec benignitas tanto ostenditur maior, quanto pro nobis graviora et abiectiora sustinuit vel pati voluit. Deus enim, *qui proprio Filio suo non peperit, sed pro nobis omnibus tradidit illum, quomodo non cum illo omnia nobis donavit*²? Ex quo invitamur ad ipsum amandum et amatum imitandum.

10. Vae ergo illis qui tantae benignitatis beneficiis sunt ingrati, in quorum animabus nullum mors Christi habet effectum! « Vide, inquit Bernardus³, caput Christi inclinatum ad osculandum, brachia extensa ad amplexandum, manus perfossas ad largiendum, latus apertum ad diligendum, totius corporis extensionem ad se totum impendendum ». Vae iterum illis qui suis peccatis *rursum Christum in semetipsis crucifigentes, super dolorem vulnerum ipsius dolorem adiiciunt*⁴! Sed vae tertio illis quorum corda ad planctum emolliri non possunt, ad benevolentiam provocari nequeunt, ad boni operis virtutem inflammare non valet tanti sanguinis tanta effusio, tanti pretii tam ingens magnitudo! Certe isti tales *inimici crucis Christi*⁵ plus Christum, Dei Filium hodie ad dexteram Dei Patris sedentem in caelis blasphemant, quam olim Iudaei fecerunt in crucis patibulo pendentem. Ad tales, et de talibus Dominus conquerendo, per beatum Bernardum⁶ loquitur dicens: « Homo, vide, quid pro te patior; si est dolor, sicut quo crucior; ad te clamo qui pro te morior; vide poenas,

quibus afficior; vide clavos, quibus confodior. Cum sit tantus dolor exterior, sed interior planctus est gravior, dum te sic ingratum exerior ».

11. Cave igitur, mater, cave, ne tanto ingrata

Admonitio.

sis beneficio, ne tanto pro te dato indevota sis pretio; sed pone Iesum Christum crucifixum *sicut signaculum super cor tuum*⁷, ut, sicut sigillum in cera molli, sic Iesum Sponsum tuum imprimas cordi tuo et dicas cum Propheta: *Factum est cor meum tanquam cera liquescens*. Pone enim etiam *ut signaculum super brachium tuum*⁸, ut videlicet nunquam desinas bonum operari, nunquam fatigeris laborare pro nomine Domini Iesu; sed cum omnia operata fueris, tunc primum incipe, quasi nihil feceris. Si autem aliquando aliquid triste, aliquid

Notandum.

grave, aliquid taedii, aliquid amaritudinis acciderit, vel certe si aliquando aliquod bonum desipuerit⁹, statim recurras ad crucifixum Iesum pendentem in cruce; ibique intueri coronam spineam, clavos ferreos, lanceam lateris; ibique contemplare vulnera pedum et vulnera manuum, vulnera capitis, vulnus lateris, vulnera totius corporis, recolens, quia qui sic pro te passus fuit, qui pro te tanta sustinuit, quantum te amaverit. Crede mihi, quia statim tali intuitu omne triste laetum, omne grave leve, omne taediosum amabile, asperum dulce et suave reperies, sic ut et tu exclamare cum beato Iob¹⁰ incipias et dicas: *Quae prius noluit tangere anima mea, nunc prae angustia, passionis Christi, cibi mei sunt*, ac si diceres: bona, quae prius animae meae desipiebant, nunc propter angustiam passionis Christi, quam video, dulcia et delectabilia facta sunt mihi. — Unde legitur¹¹, quod quidam, cum conversus

Exemplum.

¹ Ioan. 10, 15. — Superius pro *Filius Dei altissimi* (ita BE) Vat. *Dei Filius altissimus*.

² Rom. 8, 32. — Superius post *tanto* Vat. cum pluribus codd. addit *magis*.

³ Hanc sententiam in operibus Bernardi non invenimus. Cfr. supra pag. 41, nota 3. Ex B supplevimus *brachia extensa ad amplexandum*.

⁴ Hebr. 6, 6: Rursum crucifigentes sibi in seipsis Filium Dei. Ps. 68, 27: Super dolorem vulnerum meorum addiderunt. — Inferius vocibus *quorum corda* DF interserunt *dura*, et pro *ad benevolentiam provocari nequeunt* (ita B) CF *ad benevolentiam provocare nequit* (supple ex seqq. *tanti sanguinis tanta effusio*), Vat. *neque ad benevolentiam provocari*, quae etiam subinde post *non valet* prosequitur *tanta effusio sanguinis, effusio tanti pretii, tam ingens magnitudo*.

⁵ Respicitur Phil. 3, 18. — Inferius pro *blasphemant* (ita BCF) Vat. *crucifigunt*.

⁶ Cfr. supra pag. 40, nota 7. Fr. Mone, Hymni latini medii aevi, p. I. pag. 172, inter hymnos Bernardo tributos affert etiam fragmentum cuiusdam carminis (*Bernardus, in persona Christi, prologus primus*), cuius quatuor versiculi (ceteri desunt), uno excepto, conveniunt cum istis qui hic exhibentur; secun-

dus (qui etiam omittitur a S. Bonav., III. Sent. d. 16. a. 2. q. 3. in fine) et quartus tamen omittuntur. Vat. ultimos versiculos sic proponit: Et cum sit tantus dolor interior et exterior, planctus est gravior, cum te sic exerior.

⁷ Cant. 8, 6. — Sequitur Ps. 21, 15.

⁸ Cant. 8, 6. — Subinde respicitur Gal. 6, 9. seq.: Bonum autem facientes, non deficimus... ergo, dum tempus habemus, operemur bonum etc. — Inferius ante *operari* ex BCF supplevimus *bonum*.

⁹ Codd. BCF *desiperet*.

¹⁰ Cap. 6, 7, ubi pro *noluit* Vulgata *notebat*, et pro *prae angustia* Vat. *propter angustias*, quae etiam post *cibi mei sunt*, omissa explicatione a BCF exhibita, prosequitur *quam dulcia et delectabilia facta sunt*. Cfr. Gregor., VII. Moral. c. 15. n. 48.

¹¹ Idem legitur in Chronicle XXIV Generalium (Analecta Franciscana, tom. III. Quaracchi), sub generali ministro Ioanne de Parna (praedecessore S. Bonaventurae), tit. *Qualiter pavit fratres cibo gloriae*. Cfr. Marc. de Ulyssipone, Chronic. p. II. libr. IV. c. 10. — Inferius pro *multum factus est impatiens* (ita BC) Vat. *in tantum factus est impatiens*, et pro *ex nimia impatientia* CDF *ex humana impatientia*.

et ibi replicare coepit cum multis lacrymis intolerabiles angustias et labores Ordinis, insipiditatem ciborum panis et potus; et statim ex latere imaginis coepit sanguis emanare, et cum ille, fortiter flens,

suas angustias replicaret, respondens imago Christi dixit, quandocumque sentiret aliquam asperitatem in cibo vel potu, quod intingeret in salsamento sanguinis Christi.

CAPITULUM VII.

De perfecta Dei caritate.

1. Superius te, famulam Dei, prout inspiravit Dominus, docui, qualiter animum tuum exercere debeas, ut quasi gradatim ascendere possis et de virtute in virtutem proficere¹. Nunc septimo loco restat dicendum de forma virtutum, scilicet caritate, quae sola ducit hominem ad perfectionem. Ad mortificandum enim vitia, ad proficiendum in gratia, ad consequendum omnium virtutum perfectionem summam nihil dici melius, nihil excogitari potest utilius caritate. Propterea dicit Prosper in libro de Vita contemplativa²: «Caritas est vita virtutum, mors vitiorum», et *sicut fluit cera a facie ignis, sic pereunt vitia a facie caritatis*. Tanta siquidem virtutis est caritas, quod ipsa sola claudit infernum, sola aperit caelum, sola spem salutis tribuit, sola Deo amabilem reddit. Tanta virtutis caritas est, quod ipsa sola inter virtutes *virtus* nominata est, quam qui habet dives et locuples et beatus est, quam qui non habet pauper et mendicus et miser est³. Unde super illo verbo ad Corinthios⁴: *Si caritatem non habuerit*, dicit Glossa: «Attende, quanta sit caritas, quae si desit, frustra habentur cetera; si autem adsit, habentur omnia; quam qui habere coeperit Spiritum sanctum habebit». Et beatus Augustinus⁵ dicit: «Si virtus ad beatam vitam nos ducit, nihil esse virtutem omnino affirmaverim nisi summum amorem Dei». Cum igitur caritas virtus tanta sit, prae cunctis virtutibus caritati est insistendum, et non cuilibet caritati, sed ei solum, qua Deus diligitur super omnia et proximus propter Deum.

2. Qualiter autem Creatorem tuum debeas diligere, ipse Sponsus tuus docet te in Evangelio⁶, dicens: *Diliges Dominum Deum tuum ex toto corde tuo et ex tota anima tua et ex tota mente tua*. Intende diligenter, famula Iesu Christi dilectissima, quam dilectionem dilectus tuus Iesus requirat a te. Vult certe amantissimus tuus, ut amoris suo des totum cor, totam animam tuam, totam mentem tuam, sic ut in toto corde tuo, in tota anima tua, in tota mente tua nullus omnino cum eo partem aliquam possideat. Quid ergo facias, ut certe Dominum Deum tuum *ex toto corde diligas*? Quomodo *ex toto corde*? Audi beatum Iohannem Chrysostomum⁷ docentem te: «*Ex toto corde Deum diligere* est, ut ad nullius rei dilectionem magis sit inclinatum cor tuum quam Dei, ut non delecteris in specie mundi amplius quam in Deo, non in honoribus, non in parentibus. Si autem aliquo istorum sit occupatus amor cordis tui, iam non ex toto corde diligis». Rogo te, ancilla Christi, noli in amore decipi. Certe, si quid amas, quod non in Deo, aut propter Deum amas, iam non ex toto corde diligis. Unde Augustinus⁸ dicit: «Domine, minus te amat qui tecum aliquid amat». Si autem aliquid amas, ex cuius dilectione in amore Dei non proficis, iam non ex toto corde diligis; et si quid diligis, pro cuius amore ea quae Christo teneris, negligis, iam non ex toto corde diligis. Dilige itaque Dominum Deum tuum ex toto corde tuo.

3. Non solum ex toto corde, verum etiam *ex tota anima* diligendus est Dominus Deus Iesus

¹ Psalm. 83, 8: Ibunt de virtute in virtutem. — Superius pro *famulam Dei* C *famula Dei*. Inferius pro *perfectionem summam* F *perfectionis summam*.

² Libr. III. c. 13: Caritas est... mors criminum, vita virtutum. — Subinde respicitur Ps. 67, 3: Sicut fluit cera a facie ignis, sic pereant peccatores a facie Dei. — Quod caritas sit forma virtutum, ostendit S. Bonav., III. Sent. d. 36. q. 6.

³ Respicitur Apoc. 3, 17. seq.: Quia dicis: Quod dives sum et locupletatus et nullius egeo, et nescis, quia tu es miser et miserabilis et pauper etc. August., Serm. 350. (alias 39. de Tempore, vel de Laude caritatis) n. 3: Sine qua [caritate] dives pauper est, et cum qua pauper dives est. Idem Serm. 304. (alias 37. de Diversis, vel Serm. 3. in solemnitate Laurentii martyris) c. 5. n. 4: Sed tunc potest in istis esse virtus invicta, si non sit caritas ficta. Ille ergo dat nobis *veram virtutem*, qui diffundit in nostris cordibus *caritatem* [cfr. Rom. 5, 5]. Richard. a S. Vict., Adnotatio in Ps. 44: Merito regina virtutum caritas esse dicitur, quia virtutis nomen amittit quae caritati non famulatur. — Superius ex B C D F supplevimus *sola spem salutis tribuit*.

⁴ Epist. I. 13, 2. — Glossa integra habetur apud Petr. Lombard. in I. Cor. 13, 4; in Glossa *ordinaria* apud Strabum et Lyrarum exhibetur tantum prima pars; ipsa sumta est ex August., in Ioan. Evang. tr. 9. n. 8.

⁵ Libr. I. de Moribus Ecclesiae cathol. c. 15. n. 25. — Inferius pro *propter Deum* (ita B C F) Vat. *post Deum*.
⁶ Matth. 22, 37; Marc. 12, 30. et Luc. 10, 27. — Inferius pro *Iesu Christi dilectissima* [Vat. *dulcissima*] D F *Iesu Christo dilectissima*, et pro *des totum cor* (ita B C) Vat. *des cor tuum*, quae etiam subinde omittit *in tota anima tua*.

⁷ Homil. 42. in Matth. 22, 37. (Op. imperfect.). Textus originalis hinc inde plura interserit. — Pro *docentem te* (ita B C F) Vat. *dicentem*.
⁸ Libr. X. Confess. c. 29. n. 40. Cfr. supra pag. 44, nota 2. — Superius ex B C F supplevimus *Rogo te... iam non ex toto corde diligis*. Inferius ante *teneris* excidisse videtur *praestare*.

Christus. Quomodo *ex tota anima*? Audi beatum Augustinum¹ docentem te: « *Ex tota*, inquit, *anima Deum diligere* est ipsum diligere ex tota voluntate sine contrarietate ». Certe tunc ex tota anima diligis, quando non quod tu vis, non quod mundus consulit, non quod caro suggerit, sed quod Dominum Deum tuum scis velle sine contradictione libenter facis. Certe tunc Deum ex tota anima diligis, quando pro amore Iesu Christi animam tuam, si necesse fuerit, morti libenter exponis. Si autem

in aliquo istorum negligens fueris, iam non ex tota anima diligis. Dilige ergo Dominum Deum tuum ex tota anima tua, id est, conforma² voluntatem tuam voluntati divinae in omnibus.

4. Non autem solum ex toto corde, non solum ex tota anima, sed etiam *ex tota mente* dilige Sponsum tuum Dominum Iesum. Quomodo *ex tota mente*? Audi iterum beatum Augustinum³ te docentem: « *Ex tota*, inquit, *mente Deum diligere* est diligere eum ex omni memoria sine oblivione ».

Item, ex tota mente.

CAPITULUM VIII.

De finali perseverantia.

1. Postquam omnium virtutum quis adeptus est principium, nondum tamen in conspectu Dei apparere gloriosus, nisi virtutum consummatoria adsit perseverantia, quia nullus omnino mortalis, quantumcumque perfectus, laudandus est in vita sua, nisi prius hoc bonum, quod inchoavit, bono et felice fine concludat. Est enim perseverantia finis et « consummatoria virtutum, nutrix ad meritum, mediatrix ad praemium⁴ ». Unde beatus Bernardus dicit: « Tolle perseverantiam, nec obsequium nec beneficium gratiam, nec laudem fortitudo praestabit ». Parum enim valeret, hominem fuisse religiosum, fuisse patientem et humilem, fuisse devotum et continentem, Deum dilexisse et ceteras virtutes habuisse, nisi adesset perseverantia. Cum enim omnes virtutes currant, sola perseverantia *accipit bravium*⁵; quia non ille qui inceptit, sed *qui perseveraverit salvus erit*. Unde Ioannes Chrysostomus dicit: « Quae utilitas seminum florentium et postea tabescentium »? quasi dicat: penitus nulla.

2. Si igitur, Christi virgo dilectissima, aliquas bonorum operum habes virtutes, immo quia multas habes virtutes; in his persevera, in his profice, in his usque ad mortem viriliter age Christi militiam, ut cum extrema dies finisque vitae tuae advenerit, pro stipendio et mercede laboris detur tibi corona gloriae et honoris. Unde Iesus Christus, unice tibi dilectus, alloquitur te in Apocalypsi⁶, dicens: *Esto fidelis usque ad mortem, et dabo tibi coronam vitae*. Haec corona nihil aliud est quam merces vitae aeternae, ad quam adipiscendam inflammari debet desiderium omnium Christianorum. Est enim tam magna, ut nullus omnino eam aestimare possit, sicut dicit beatus Gregorius⁷, tam multa, ut nullus eam dinumerare queat, est denique tam longa et durabilis, ut nunquam terminari valeat et finiri. — Ad hanc mercedem, ad hanc coronam invitat te dilectus Sponsus tuus, Iesus Christus in Canticis⁸ dicens: *Veni de Libano, sponsa mea, amica mea, veni de Libano, veni coronaberis. Surge ergo, amica*

Admonitio.

Invitat ad coronam. Christus.

¹ Serm. 108. in Appendice (alias 53. de Tempore), lib. de Spiritu et anima (inter opera August.), c. 33, lib. de Diligendo Deo (inter opera August.), c. 2, verba Domini *Diliges Dominum Deum tuum ex toto corde, ex tota anima, ex tota mente* simpliciter ita exponuntur: id est ex toto intellectu tuo, ex tota voluntate tua, ex tota memoria tua; ea vero, quae huic expositioni adiunguntur, scil. *sine errore, sine contrarietate, sine oblivione*, exhibet Innocent. III., Serm. 5. in Communi de uno martyre. Vide quae diximus tom. I. pag. 81, nota 8. et tom. III. pag. 613, nota 7.

² Ita BCF, Vat. et conforma.

³ Cfr. supra nota 4. — Superius ex BCF supplevimus *Non solum autem ex toto corde, et subinde dilige Sponsum tuum Dominum Iesum. Quomodo ex tota mente?*

⁴ Bernard., Epist. 129. n. 2. Ex BCF hunc locum supplevimus. Loc. cit. habetur etiam seq. sententia Bernardi, in qua textus originalis post *obsequium* addit *mercedem habet*, omisso subiade *praestabit*; Vat. contra DF et textum originale voci *gratiam* praefigit *nec*, quae etiam inferius pro *et ceteras virtutes* (ita BC) habet *et caelicas virtutes*.

⁵ Respicitur I. Cor. 9, 24. — Sequitur Matth. 10, 22, quem locum exponens Chrysost., Homil. 33. (alias 34.) n. 5, profert sententiam mox allatam.

⁶ Cap. 2, 10. — Inferius pro *merces* (ita BCF) Vat. *praemium*, et *inflammare te* pro *inflammari*.

⁷ Libr. II. Homil. in Evang. homil. 37. n. 4: Si consideremus, fratres carissimi, quae et quanta sunt quae nobis promittuntur in caelis, vilescunt animo omnia, quae habentur in terris... Quae autem lingua dicere vel quis intellectus capere sufficit illae supernae civitatis quanta sint gaudia etc. Cfr. supra pag. 58, nota 10; pag. 60, nota 3. et pag. 62, nota 3. Libr. I. Homil. in Evang. homil. 9. n. 2: Pauca quippe bona sunt omnia praesentis vitae, quamlibet multa esse videantur, comparatione retributionis aeternae. Sed tunc fidelis servus super multa constituitur, quando, devicta omnis corruptionis molestia, de aeternis gaudiis in illa caelesti sede gloriatur etc. Vide supra Opusculum II. Soliloq. c. 4. n. 1. in fine.

⁸ Cap. 4, 8, ubi Vulgata et Vat. omittunt *amica mea*, quod habent BCF. Ibid. 2, 40: Surge, propra amica mea, columba mea, formosa mea, et veni. — Inferius respicitur Apoc. 19, 9: Beati, qui ad coenam nuptiarum Agni vocati sunt. Matth. 22, 4: Dicite invitatis: Ecce, prandium meum paravi... et omnia parata. Cfr. Luc. 14, 17. — De propositione *tota caelestis curia te expectat*, vide supra Opusculum II. Soliloq. c. 4. n. 3. in fine.

Dei, sponsa Iesu Christi, *columba Regis aeterni, veni, prospera* ad nuptias Filii Dei, quia tota caelestis curia te exspectat, quia *omnia sunt parata*.

3. Est enim paratus *speciosus servus* et nobilis, ut tibi serviat; *cibus pretiosus* et delectabilis, ut te reficiat; *societas dulcis* et praeamicabilis¹, ut tibi congaudeat. — *Surge ergo et prospera* festinanter ad nuptias, quia ibi est paratus *servus speciosus*, qui tibi serviat. Iste servus non est alter nisi coetus angelicus, immo ipse aeterni Dei Filius, sicut ipse de se ipso testatur in Evangelio² dicens: *Amen dico vobis, quia praecinget se et faciet illos discumbere et transiens ministrabit eis*. O quam magna gloria tunc erit pauperibus et abiectis, quando ministrum habebunt Filium Dei, summi Regis, et totum conventum exercitus regni caelestis!

Tria in caelo iam parata.

De primo.

4. Est etiam ibi paratus *cibus pretiosus* et delectabilis, ut te reficiat. Ipse enim Dei Filius mensam propriis manibus ponet, sicut ipse de se in Evangelio³ testatur dicens: *Ego dispono vobis, sicut disposuit mihi Pater meus regnum, ut edatis et bibatis super mensam meam in regno meo*. O quam suavis et deliciosus est ille cibus, quem *paravit in dulcedine sua pauperi Deus*⁴! O quam beatus est ille qui in regno caelorum manducabit panem illum, qui in clibano virginalis uteri coctus est igne sancti Spiritus! *Si quis manducaverit ex hoc pane, vivet in aeternum*. Tali cibo, tali pane cibatur et reficitur suos electos ille Rex caelestis in mensa sua, sicut in libro Sapientiae⁵ dicitur: *Angelorum esca nutriti sunt populum tuum et paratum panem de caelo praestitisti ei sine labore, omne delectamentum in se habentem et omnis saporis suavitatem — et deserviens uniuscuiusque voluntati*. Ecce, talis est refectio divinae mensae.

De secundo.

5. Est nihilominus parata ibi *societas dulcis* et praeamicabilis⁶, ut tibi congaudeat. Illic enim erit Iesus cum Patre et Spiritu sancto; illic Maria cum florifero exercitu Virginum; illic Apostoli, Martyres, Confessores et omnium electorum caelestis exercitus. Miserabilis prorsus, qui tam nobilissimae societati non fuerit sociatus; valde mortuum habet desiderium qui huic societati iungi non desiderat.

De tertio.

6. Sed tu, o praeclarissima Christi famula, scio quidem, te desiderare Christum, scio, totis te ad hoc niti viribus, quomodo Regis aeterni possis iungi consortio et amplexibus. Et « nunc excita cor tuum et animam tuam et erige totum intellectum tuum et cogita, quantum potes. Si enim singula bona delectabilia sunt, cogita intente, quam delectabile sit illud bonum, quod continet iucunditatem omnium bonorum; si bona est vita creata, quam bona est vita creatrix; si iucunda est salus facta, quam iucunda est salus, quae fecit omnem salutem⁷ »? « Qui hoc bono fruatur, quid illi erit, et quid illi non erit? Certe quidquid volet erit, quidquid nolet non erit. Ibi quippe erunt bona corporis et animae, qualia *nec oculus vidit, nec auris audivit, nec cor hominis intellexit*⁸. Cur ergo, famula Dei, per multa vagaris, quaerendo bona animae tuae et corporis tui? Ama unum bonum, in quo sunt omnia bona, et sufficit; desidera simplex bonum, quod est omne bonum, et est satis ».

Ibi est complementum omnium desideriorum

7. « Ibi est quod amas, mater mea, quod desideras, virgo beata. Quid amas, mater mea, quid desideras, virgo beata? Ibi est quidquid amas, quidquid desideras. Si te delectat *pulchritudo*, fulgebunt *iusti sicut sol*⁹. Si delectat *longa et salubris vita*, ibi est sana aeternitas, quia *iusti in perpetuum vivent*, et *salus iustorum aeterna*. Si te delectat *satietas*, *satiabuntur, cum apparuerit gloria Dei*¹⁰; si *ebrietas*, *inebriabuntur ab ubertate domus Dei*. Si te delectat *dulcis melodia*, ibi Angelorum chori concinunt, sine fine laudantes Deum. Si te delectat *amicitia*, ibi Sancti diligunt Deum plus quam se ipsos et invicem tanquam se ipsos, et Deus diligit illos plus quam illi se ipsos. Si *concordia* delectat, omnibus illis erit una voluntas, quia nulla illis erit nisi Dei voluntas. Si te delectat *honor et divitiae*, Deus servos suos et ancillas suas bonos et fideles *supra multa constituet*¹¹, immo *filius et filiae Dei vocabuntur* et erunt; ubi Deus erit, ibi erunt et illi, *heredes quidem Dei, coheredes autem Christi* ».

8. « Quale autem, vel quantum gaudium est, ubi tale ac tantum est bonum? Certe, Domine Iesu, *nec oculus vidit, nec auris audivit, nec in cor*

¹ Cod. F *praeamicabilis*, quod etiam inferius n. 5. Vat. contra BC habet.

² Luc. 12, 37. Cfr. supra Opusculum II. Soliloq. c. 4. n. 12. — Superius pro *non est alter nisi* BF *non est alter quam*, et pro *aeterni Dei* [C addit *Patris*] *Filius*, quod habent B C D F, Vat. *aeternus Dei Filius*, quae etiam inferius pro *pauperibus et abiectis* (ita C) substituit *pauperibus abiectis*.

³ Luc. 22, 29. et 30.

⁴ Psalm. 67, 11. — Subinde allegatur Ioan. 6, 52.

⁵ Cap. 16, 20. seq. Post *suavitatem* Vulgata prosequitur: Substantia enim tua dulcedinem tuam, quam in filios habes, ostendebat, et deserviens etc. Pro *in se habentem* B C D F *in se habens*. — Cfr. supra Opusculum II. Soliloq. c. 4. n. 11; ibid. n. 12. seqq. fusius exponitur quod infra n. 5. tangitur.

⁶ Ita BC, Vat. *praeamicabilis*; cfr. supra nota 1. Inferius B C D F omittunt *Apostoli*, et subinde omittit C *caelestis*.

⁷ Anselm., Proslog. c. 24. Textus originalis hinc inde plura interserit. Ibid. c. 25. habentur quae sequuntur.

⁸ Epist. I. Cor. 2, 9.

⁹ Matth. 13, 43. — Duo seqq. loci sunt Sap. 5, 16. et Ps. 36, 39: Salus autem iustorum a Domino (ita etiam textus originalis). Ibi C D E F omittunt *aeterna*, pro quo B *in aeternum erit*.

¹⁰ Psalm. 46, 15. — Sequitur Ps. 33, 9. — Inferius pro *concinunt, sine fine laudantes Deum* (ita B C D F) Vat. *concinunt alleluia laudantes*, textus originalis *concinunt sine fine Deo*. Subinde ex B C F supplevimus et *invicem tanquam se ipsos* (ita etiam textus originalis) et ex B C substituiimus *Si concordia delectat pro Si concordia delectaris*; pro *omnibus illis erit* C *omnibus illis erit*, et pro *nulla illis erit* (ita BF cum textu originali) Vat. *nulla erit ibi*.

¹¹ Matth. 25, 21. et 23. — Seq. locus est ibid. 5, 9; deinde respicitur Ioan. 12, 26: Ubi sum ego, illic et minister meus

hominis ascendit in hac vita, quantum tui Beati te amabunt et de te gaudebunt in illa beata vita ¹ ».

Quantum quisque hic Deum amat, tantum ibi de Deo gaudebit. Ergo hic Deum multum ama, ut ibi multum gaudeas; crescat hic in te amor Dei, ut ibi plene possideas gaudium Dei. « Meditetur inde mens tua, loquatur inde lingua tua, amet illud cor tuum,

sermocinetur os tuum, esuriat illud anima tua, sitiatur illud caro tua, desideret tota substantia tua, donec intres *in gaudium Dei tui* ² », donec venias ad amplexus dilecti tui, donec introducat te in thalamum dilecti Sponsi tui, qui cum Patre et Spiritu sancto vivit et regnat unus Deus per omnia saecula saeculorum. Amen.

erit (Vat. contra BCF omittit *ubi Deus erit, ibi erunt et illi*; textus originalis *et ubi erit Filius eius, ibi erunt et illi*) et allegatur Rom. 8, 17.

¹ Ultimam propositionem, in qua allegatur I. Cor. 2, 9, exhibet Anselm., loc. cit. c. 26.

² Anselm., loc. cit. Allegatur Matth. 25, 21. Sicut Brevilo-

quium et Soliloquium, ita et hoc Opusculum S. Doctor iisdem concludit verbis Anselmi. Cfr. supra pag. 66, nota 9. — In fine addit A: *Explicit Bonaventura ad sorores suas, moniales sanctae Clarae*; B autem: *Explicit tractatus Bonaventurae de profectu vitae religiosae*.

